

## Yohani

<sup>1</sup> Kuvutengulilo kwe alyale ulisio, ulisio ujuo alyale palikimo nu Nguluve, kange ulisio alyale ghuse, Nguluve. <sup>2</sup> Kuhuma kuvute ngulilo, ulisio ujuo alyale palikimo nu Nguluve. <sup>3</sup> UNGULVE alyapelile ifiinu fyoni kukilila umwene. Nakwekili nambe kimo kino alyapelile kisila kukilila kwa mwene ujuo. <sup>4</sup> Mwa mwene mw-evulyale uvusumi, uvusumi uvuo vukava lumuli ku vaanhу vooni. <sup>5</sup> Ulumuli uluo lumulika mu nigliisi, ingiisi jikunilue kukulema. <sup>6</sup> UNGULVE alyansung'hile umuunhu jumonga junu akatambukagha Yohani. <sup>7</sup> UYohani ujuo, alisile kukwoleka imhola isa lumuli uluo, kuuti avaanhу vooni vitike kukilila umwene. <sup>8</sup> UYohani ujuo naalyale ghwe lumuli uluo, looli alisile kukwoleka ulumuli. <sup>9</sup> Ulumuli uluo ulwa kyang'haani, luno lukava lukwisa muiisi, uluo lukavamulikila avaanhу vooni. Ulumuli uluo. <sup>10</sup> Ulisio mwe alyale mu iisi, naji iisi jooni jilyapelilue kukilila umwene, neke avaanhу navalyankagwile. <sup>11</sup> Alisile kuvaanhу vaake, aveene navalyamwupiile. Neke avaanhу vooni vano valya valyamwupiile na kukumwitika, akavaviika kuuva vaana va Nguluve. <sup>12</sup> Neke avaanhу vooni vano valya valyamwupiile na kukumwitika, akavaviika kuuva vaana va Nguluve. <sup>13</sup> Nakwekuti vaana va Nguluve vwimila ifisia fyave, nambemulwa kuholua nu mughosu nu ndala, nambe muvughane vwa muunhu,

looli UNguluve jujuo ghwe juno avavikile kuuva vanaake. <sup>14</sup> Ulisio ujuo akava muunhu, akikala palikimo nusue, najusue tukuvuvona uvuvaha vwake, uvuvaha vuno vuhufia kuuti ghwe mwana jumo mwene ghwa Nguluve uNhaata. Umwene ali nu lusungu fijo nu vwakyang'haani vwoni. <sup>15</sup> UYohani akavoleka avaanhу imhola isa muunhu ujuo, akajova fijo akati, "Uju ghwe juno najovagha kuuti, 'Juno ikwisa kumbele kulyune, m'baha kukila une, ulwakuva kwealyale une ye nikyale kuholua.'" <sup>16</sup> Usue tweni muvukwilanifu vwake, twupiile ulusungu lwake, kange ifikutusungukilagha jaatu. <sup>17</sup> Ulwakuva indaghilo saake alyatupeliile kukilila uMose, ulusungu nu vwakyang'haani atupeliile kukilila uYesu kilisite. <sup>18</sup> Nakwale umuunhu juno aghelile kukumwagha uNguluve, ali palikimo nu Ngu-luve uNhaata. Ujuo ghwe mwene atuhufisie uNguluve. <sup>19</sup> Avalongosi va Vayahudi valyavasung'hile avatekesi na Valeevi kukumposia uYohani kuuti ghwe veeni. <sup>20</sup> Umwene akavoleka kisila kufisa, akati, "Une naneene Kiliste." <sup>21</sup> Vakamposi kange vakati, "Lino uve veeni? Asi, veeve m'bili Eliya?" UYohani akavamula akati, "Ndali, na neene Eliya." Vakamposia kange vakati, Veeve m'bili?" Akavamula akati, "Ndali na neene." <sup>22</sup> Vakamposi kange vakati, "Lino uve veeve veeve veeve?" Ghukutambula veeve veeni? Tulonda tugomosie ulwamulo ku vano vatusung'hile?" <sup>23</sup> UYohani akavamula akati, Une neene lisio lya muunhu juno ikemeela ku'lukuve iiti, munnosekesyaghe uMutwa isila." Ndavule alyajovile um'bili uYesaya." <sup>24</sup> Pepano

avaanu vala vano valyasung'hilue na Vafalisayo vakampos kange vakati, <sup>25</sup> “Nave naveeve Kilisite, nambe naveeve Eliya nambe na uli m'bili, ongo ghukwofugha?” <sup>26</sup> UYohani akavamula akati, “Une nikwofungha na malenga, neke nkate mulyumue pwale juno umue namunk-agwile. <sup>27</sup> Ujuo ghwe juno ikwisa kumbele kulyune. Une naninoghiile nambe kuhudula utukova utwa filatu tyake. <sup>28</sup> Isio silyavombiike mu kikaaja kya ikya Betania, imwambo ja Yolidani, ukuo kwe kuno uYohani alyale ikwifugha avaanhу. <sup>29</sup> Ikigho ikivingilili, uYohani akamwagha uYesu ikwisa kwa mwene. Pe akavavuula avaaanhу akati, “Lolagha, uju ghwe kakolo ghwa nguluvve, ghwe mwene ivusia uvuhosi vwa vaanhу vooni. <sup>30</sup> Uju ghwe juno navagha kuuti, “Juno ikwisa kumbele kulyune, m'baha kukila une, ulwakuva kwe alyale une ye nokyale kuholua.’ <sup>31</sup> Najune nanikaakagwile kuuti ghwe kakolo, looli une nilisile kukwofungha avaanu na malenga, kuuti aVaisilaeli vankagule.” <sup>32</sup> Kange uYohani akavavuula akati, “Nimwaghile uMhepo uMwimike ikwika kuhuma kukyanya hwene ng'unda na kukwima pa mwene. <sup>33</sup> Une nanivele nikagwile, neke UNguluve juno asung'hile kukwofugha avaanhу na malenga ambulile kuuti, ‘Umuunhu juno kyaukumwagha uMhepo ikwika na kukwima pa mwene ujuo ghwe juno ikwofughagha nu Mhepo uMwimike.” <sup>34</sup> UYohani akafijovagha akatisagha, “Une nisivwene isio na maaso ghango, kange nijova isa kyang'haani, kuuti uju ghwe

mwana ghwa Nguluve.” <sup>35</sup> Ikighono ikya vuvili, <sup>36</sup> kange, ikighono ikivingilili, uYohani uMwofughi akava imile palikimo na vavulanisivua vaake vavili, vakamwagha UYesu ikila, pe uYohani akati, “Lolagha, ukakologhwa Nguluve!” <sup>37</sup> Avavulanisivua vavili vala, ye vampuliike uYohani ijoba amasio aghuo, vaka m'bingilila uYesu. <sup>38</sup> Pe uYesu akasyetuka, akavona vikum'bingilila, akavaposia akati, mulonda kiki? “Aveene vakamwamula vakati, “Rabi, (kwe kuti m'bulanisi) ghukukala kuughi?” <sup>39</sup> UYesu akati, “Mwise, mukupaagha.” Pe vakam'bingilila. Pakivwilile, akavalilo aka kijigho, vakafika pano ikalagha, vakava lumo ikighono kila. <sup>40</sup> Umo mu vavulanisivua vavili vala vano vakapuliike amasio gha Yohani na kukum'bingilila uYesu, alyale ghwe Ndeleya unnuuna ghwa Simoni Peteli. <sup>41</sup> Undeleya akamwagha unkulu ghwake uSimoni, akam'buula akati, “Tumwaghile uMesiya” (Mesiya kwe kuti Kiliste). <sup>42</sup> Pe akantwala uSimoni kwa Yesu. UYesu akamulola uSimoni, akam'buula akati, Uve veeve Simoni mwana ghwa Yohani, lino ghutambulwaga Keefa,” (Kwe kuti' Peteli). <sup>43</sup> Ikighono ikivingilili, uYesu ye ilonda pivuuka kuluta ku kighavo ikya Galilaya, akamwagha uFilipo, akambuula akati “Umbingililaghe.” <sup>44</sup> UFilipo alyale mhuma mu likaaja ilya Betisaida. Ghwope uNdeleya nu Peteli vakahumagha mulikaaja ilio. <sup>45</sup> UFilipo akamwagha uNatanaeli, akambuula akati, “Tumwaghile umuunhu juno imhola saake silyalembilue nu Moose mu kitabu ikya Ndaghilo, na mufitabu ifya vavili. Ujoo ghwe

Yesu mwana ghwa Yosefu umhuma ku Nasaleti. <sup>46</sup> UNatanaeli akamposia uFilipo akati, “Ikiinu ikinono ndepoonu kihuma ku Nasaleti? “UFilipo akamwamula akati, “Ghwise, ulole!” <sup>47</sup> UYesu ye amwaghile uNatanaeli ikwisa kwa mwene, akajova akati, “Lolagha, ujuo ghwe Muisilaeli ghwa kyang'haani, nsila vukedusi nkate mwa mwene.” <sup>48</sup> UNatanaeli akamposia uYesu akati, “Ghwe Mutwa, ung'hagwile ndaani?” UYesu akamwamula na kukum'bula akati, “Nambe uFilipo ye akyale pikukukemeela, une niveele nikwaghile, ghukalile paasi pa mpiki untini.” <sup>49</sup> Pe uNatanaeli akamwamula akati, “Ghwe Mbulanisi, lino nikagwile kuuti, uli mwana ghwa Nguluve! Uli Ntwa ghwa Isilaeli!” <sup>50</sup> UYesu akamposia akati, “Ghukwitika ulwakuva nikuvuvulile kuuti niveele nikuvwene ye ghukalile pa mpiki untini? Lino ghukusivona isingi imbaha kukila isi. <sup>51</sup> UYesu akavavuula akati, kyang'haani nikuvavuula, mulikuvuvona uvulanga vudinduka na vanyamola va Nguluve vitogha na kukwika palyune ne Mwana ghwa Muunhu.”

## Sura ya 2

<sup>1</sup> Ye fikilile ifighono fidatu, kwe vulyale uvutolani ku kikaaja ikya Kana mukighavo ikya Galilaya ghwope ung'hina ghwa Yesu pwealyale pa vutolani uvuo. <sup>2</sup> U Yesu na vavulanisivua vaake voope pwealyale pa vutolani uvuo ulwakuva valyakutilue. <sup>3</sup> Unsiki ye vamalile uluhuuje, ung'hina ghwa Yesu akambuula uYesu akati, “Vasila luhuuje”. <sup>4</sup> U Yesu akamwamula ung'hina akati, “Mama, kiki ukumbuula isio?

Unsiki ughwa kuvomba imbombo jango ghukyale” <sup>5</sup> Pe ung'hina akavavuula avavombi akati, “Kino kyaikuvavuula, muvombaghe.” <sup>6</sup> Pa vutolani pala pwesilyale isaaji ntanda isa mavue. Isaaji isio silyale sa malenga agha kusogha, muliva kuvalasia ndavule lwale lwiho ku Vayahudi, ulusaji lumo lukamemagha amalenga amateneka ghavili nambe ghatatu. <sup>7</sup> UYesu akavavuula avavombi vala akati, “Mumemie amalenga mu saaji isio.” Avavombi vala vakamemia. <sup>8</sup> Pe akavavuula avavombi vala akati, “Negha amalenga ghamonga mu saaji, muntwalile um'baha ughwa kikulukulu.” Vakavomba ndavule avalaghile. <sup>9</sup> Umbaha jula akavonja amalenga ghala ghano ghahambwike kuuva luhuuje, neke naalyakagwile kuno luumile (looli avavombi vano valyaneghile amalenga, valyakagwile kuno luhumile). Pe akankemeela untoola n'dala <sup>10</sup> akamb'buula akati, “Umuunhu ghwensi taasi ihumia ihumi uluhuuje ulunono, neke kyande avanu vanywile vakwilile, pe ihumia uluhuuje luno nalunono. Neke uve uvele ujiighe uvikile uluhuuje ulunono kuhanga kuvusililo” <sup>11</sup> UYesu alyavombile ikidegho iki ku Kana kukighavo ikya Galilaya, ikidegho ikio kyale kivalilo kya kwanda kuhufia uvuvaha vwake, mu uluo avavulanisivua vaake vakaghina kukumwitika. <sup>12</sup> Ikikulukulu kya vutolani yekisilile, uYesu palikimo nu ng'hina na vanuuna na vavulani sivua vaake vakaluta ku likaaja ilya Kapelnaum ukuo vakikala ifighono fidebe. <sup>13</sup> Unsiki ughwa kyimike ikya Pasaka ikya Vayahudi ye ghuli piipi, uYesu akaluta

ku Yelusalemu. <sup>14</sup> Ye afikile kula, akingila mu nyumba inyimike ija kufunyila, akavaagha avaanhу vighusia ing'ombe, ing'holo ni ng'unda kange avange vakananiagha indalama. <sup>15</sup> UYesu akatenda un'jeledi ughwa ngoji, akatengula kukuvadaga vooni mu nyumba mula palikimo ni ng'ombe ni ng'holo saave. Akabilivandula imeesa isa vano vakananiagha indalama na kukung'ha indalama saave. <sup>16</sup> Avaghusia ing'unda akavavuula akati, "Vusia ing'unda apa, namungavikaghe inyumba ja Nhata ghwango kuuva lighulilo." <sup>17</sup> Avavulanisivua vaake vakakumbuka amasio ghano ghalembilue mu malembe amimike kuuti, "Ulughano lwango vwinila inyumba jaako lukumbuda." <sup>18</sup> Pe avalongosi va Vayahudi vakamposia vakati, Ghuhufia ikivalilo kiki kuvonia kuuti, uli nu vutavulilua uvwa kuvomba isi?" <sup>19</sup> UYesu akavamula akati, memula inyumba inyimike iji ija kufunyila, une nijenga kange mu fighono fidatu." <sup>20</sup> Pe avalongosi va Vayahudi vakati, "Inyumba inyimike ija kufunyila jilyajengilue amaaka fijigho fine ni ntanda lino lwa ndaani uve ghujenga mu fighono fidatu?" <sup>21</sup> UYesu naakava ijoba inyumba inyimike ija kufunyila, ulwene akava ijoba vwinila um'bili ghwake. <sup>22</sup> Lino ye asyusivue kuhuma ku vafue, avavulanisivua vaake vakakumbuka amasio aghuo ghano alyajovile, vakitika amasio ghano ghalembilue mu malembe amimike na ghano alyajovile uYesu. <sup>23</sup> UYesu ye ali ku Yelusalemu ku kyimike ikyя Pasaka, avaanhу vinga valyamwitike, ulwakuva valyafyaghile ifivalilo

vwimila ifidegho fino alyale ivomba. <sup>24</sup> Neke uYesu naalyavatang'hinje avaanhу vooni vule valivuo. <sup>25</sup> Kange nakwevulyale uvufumbue muunhu kukum'buula sino avaanhу vakava visaagha ulwakuva alyasikagwile sooni isa mu moojo ghaave.

## Sura ya 3

<sup>1</sup> Kwe alyale um'baha jumonga ughwa Vayahudi, ughwa mukipugha kya Vafalisayi, akatambulwagha Nikodemo. <sup>2</sup> Umuunhu ujо alyalutile pakilo kwa Yesu akam'buula akati, "Ghwe m'balanisi, tukagwile kuuti uli m'bulanisi juno asung'hilue nu Nguluve, ulwakuva nakwale umuunhu juno ndepoonu ihufia ifivalilo ifi fino ghuvomba, nave uNguluve naali palikimo nu mwene." <sup>3</sup> UYesu akamwamula akati, "Kyang'haani nikukuvuula, nakwale umuunhu juno ndepoonu ikwingila mu vutwa vwa Nguluve, naaholilue ulwa vuvili." <sup>4</sup> UNikodemo akamposia uYesu akati, "Umuunhu ung'oyo iholua ndaani? Ndepoonu ikwingila mulileme lya ng'ina neke aholue ulwa vuvili?" <sup>5</sup> UYesu akamwamula akati, "Kyang'haani nikukuvuula, nakwale umuunhu juno ndepoonu ikwingila mu Vutwa vwa Nguluve, nave naaholilue na malenga nu mhepo ghwa Nguluve. <sup>6</sup> Umuunhu iholua kim'bili na vapaafi, neke juno iholua nu mhepo ghwa Nguluve ali nu vwumi kusila kusila. <sup>7</sup> Nungadeghaghe ulwakuva nikuvulile kuuti, 'lulondua kuholua ulwa vuvili.' <sup>8</sup> Imhepo jigugula kulungama kuno jilonda, ghupulika pano jigugula, neke nungakagule kuno jihuma

na kuno jiluta. Fye lulivuo nakwa muunhu juno aholilue nu mhepo ghwa Nguluve. <sup>9</sup> UNikodemus akamposia akati, “Umuunhu iholua ndaani nu mhepo?” <sup>10</sup> UYesu akamwamula akati, “Uve uli m’bulanisi ghwa Vaisilaeli, lwa ndaani nusikagwile isi? <sup>11</sup> Kyang’haani nikuvavuula, usue tujova sino tusikagwile, kange tukwoleka sino tusiwene, neke umue namukwupila uvwolesi vwitu. <sup>12</sup> Nave namukwitika pano nikuvavuula isa mu iisi muno, pe kyande mukwitika ndaani pano nikuvavuula isa kukyanya? <sup>13</sup> Ulwakuva nakwale umuunhu juno aghelile kutogha kukyanya, looli une ne, Mwana ghwa Adamu ne juno nisile kuhuma kukyanya. <sup>14</sup> Ndavule uMose pano alyatosisie munkyanya ikihwani kya njoka, fye enendiiki umwana ghwa Adamu ilondua kutosivvua, <sup>15</sup> kuuti avaanhу vano vikumwitika vaave nu vwumi uvwa kuvusila kusila. <sup>16</sup> UNguluve avaghanile fijo avanu va muiisi muno, fye nambe akantavula umwanaake juno ali jumo mwene kuuti umuunhu ghweni juno ikumwitika aleke pisova looli aave nu vwumi uvwa kuvusila kusila. <sup>17</sup> Ulwakuva uNguluve naalyansung’hile umwanake mu iisi kukuvaligha avaanhу, ulwene alyansung’hile kukuvalopoka. <sup>18</sup> Juno ikumwitika umwene, naihighua, Juno naikumwitika ahigilue ulwakuva naikumwitika umwana ghwa Nguluve juno ali jumo mwene. <sup>19</sup> Uvuvalighi uvuo vwe uvu, ulumuli lwisile mu iisi muno, neke avaanu vajighanile ing’hiisi kukila ulumuli, ulwakuva imbombo saave mbiivi. <sup>20</sup> Umuunhu ghweni

juno imbombo saake mbiivi, ikulukalalila ulumuli, naikwisa ku lumuli ulwakuva nailonda imbombo saake imbivi sivoneke pa vuvalafu. <sup>21</sup> Looli umuunhu juno ivomba isa kyang'haani, ikwisa ku lumuli, kuuti imbombo saake sivoneke sivombilue mu ngufu sa Nguluve. <sup>22</sup> Pambele uYesu na vavulanisiva vaake vakaluta kukighavo ikya Yudea. Ukuo akikala ifighono ndafilingi palikimo na veene, akava ikwofugha avaanhу. <sup>23</sup> Unsiki ughuo ghwope uYohana umwofughi alyale ikwafugha kukikaaja ikya Ainea piipi ni likaaja ilya Salim ulwakuva ukuo kwe ghalyale amalenga minga, avaanhу vakalutagha kwa mwene kuuti avofughe, <sup>24</sup> unsiki ughuo uYohana alyakyale kudindilua mu ndiinde. <sup>25</sup> Ikighono kimonga avavulanisivua vamonga va Yohana valyale vikaning'hana nu Muyahudi jumonga vvimila ulwiho ulwa kuvalasia. <sup>26</sup> Pe vakaluta kwa Yohana vakambuula vakati, Ghwe mbulanisi, umuunhu jula juno aava nuuve imwambo ija kikogha kya Yorodani, juno ghwolekagha imhola saake, lino ghwope ikwofugha avaanhу, kange avaanhу vinga viluta kwa mwene." <sup>27</sup> UYohana akavamula akati umuunhu naangave ni kimonga nave uNguluve naampeliile. <sup>28</sup> Umue mwemue muli volesi vango mu isio sino nikajovile kuuti, 'Une naneene Kilisite', ulwene uNguluve asunghile une kuuti nimulongeletele uKilisite.' <sup>29</sup> Umhinja juno itoluа muunhu ghwa ntola n'dala. Une ne juno nili ndavule ummanyaani ghwa ntola n'dala nimile palubale pa ntola n'dala, nihovokapano nipulika ilisio lyake. Kyang'haani nihovwike

fijo. <sup>30</sup> Luoghiile umwene ave mbaha fijo, une niive ndebe fijo. <sup>31</sup> Umwene juno ihuma kukyanya mbaha kukila avaanhуooni. Juno ihuma mu iisi, ghwa mu iisi ijova isa mu iisi. Neke juno ahumile kukyanya m'bahа kukila avaanhуooni. <sup>32</sup> Sino asivwene na kupulika se sino ikwoleka, neke nakwale umuunhu juno ikwupila juno ikwupila uvwolesi vwake. <sup>33</sup> Umuunhu juno ikwupila uvwolesi vwake, ihufia kuuti sino ijova uNguluve sa kyang'haani. <sup>34</sup> Ulwakuva juno asung'hilue nu Nguluve ijova amasio gha Nguluve. Ulwakuva uNguluve ampeliile ingufu sooni isa mhepo umwimike. <sup>35</sup> UNguluve uNhaata amughanile umwanaake, kange avikile fyoni mu mavoko ghaake. <sup>36</sup> Umuunhu juno ikumwitika umwana ghwa Nguluve, ali nu vwumi uvwa kuvusila kuvusila kusila, neke umuunhu juno naikumwitika, naali nu vwumi uvuo ulwene ali mu vuhighi vwa Nguluve.

## Sura ya 4

<sup>1</sup> Lino aVafalisayi vakapulika imhola sa Yesu kuuti ikwofugha na kuuva na vavulanisivua vinga kukila uYohana umwofughi, <sup>2</sup> (neke uYesu jujuo naakava ikwofugha, looli avavulanisivua vaake ve vano valyale vikwofugha), <sup>3</sup> UYesu ye akagwile kuuti imhola saake sipulikiike, akavuuka mukighavo ikya Yudea akagomoka ku kighavo ikya Galilaya. <sup>4</sup> Ye vigomoka ku Samalia lukavoneka kuuti kwevule uvufumbue uvwa kukilila mu kighavo ikya Samalia, pe

vakakilila isila ijio. <sup>5</sup> Pe vakafika mu likaaja ilya Sikali lino lyale mukighavo ikya Samalia, ilikaaja ilio lilyale piipi nu mughunda ghuno u Yakobo alyampeliile umwanake u Yosefu. <sup>6</sup> Apuo pwekilyale ikitimu kya Yakobo. UYesu akikala palubale pa kitimu ikio kuuti apuum, ulwakuva alyakatiile nu lughendo. Unsiki ughuo ghwale ghwa kavalilo aka ntanda pamwisi. <sup>7</sup> Pe akiisa umukijuva jumomonga uNsamalia kunegha amalenga pa kitimu kila, uYesu akam'buula akati, "Nisuma amalenga ninyue." <sup>8</sup> Ulwakuva avayulanisivu vaake vakava valutile kughula ikyakulia. <sup>9</sup> Umukijuva jula uNsamalia akamwamula akati, "Uve ubi Muyahudi, une nilinsamalia, lwandaani ghusuma amalenga kulyune?" Alyajovile enendiki ulwakuva aVayahudi navalyale nu vuhangilanisi na Vasamalia. <sup>10</sup> UYesu akamwamula akati, "Ghwale ukagulaghe sino uNguluve ilonda kukukupeela na kuuti nene veeni ne juno nikukusuma amalenga, ngale usumile une, une naale nikukupeela amalenga ghano ghikuvapeela avaanhу uvwumi." <sup>11</sup> Umukijuva jula akamwamula uYesu akati, "Ghwe Ntwa uve nuli ni ndoovo ija kuneghela, kyope ikitimu kitali. Lino ukughaagha kuughi amalenga gha vwumi? <sup>12</sup> Unkuulu ghwitu uYakobo alyatupeliile ikitimu iki, umwene na vanaake vanywile amalenga agha kitimu ulim'baha kukila uYakovo?" <sup>13</sup> UYesu akamwamula akati, "Umuunhu ghweni juno inyua amalenga agha kitimu iki, ikwumilua kange, <sup>14</sup> neke umuunhu juno inyua amalenga ghano nikumpeela ghiiva

nkate mwa mwene, kiiva kindwivu kya malenga ghikumpeelagha uvwumi vuno navusila lusiku.”

<sup>15</sup> Pe umukijuva jula akansuma uYesu akati, “Ghwe Ntwa, umeele amalenga aghuo, nileke pikwumilua, kange nileke pikwisa apa kunegha amalenga.” <sup>16</sup> UYesu akambuula akati, “Lutagha, unkemeele umughosi ghwako, ghwise naghwo apa.” <sup>17</sup> Umukijuva jula akamwamula akati, “Une nili nsila mughosi.” UYesu akambuula akati, “Ujovile seseene kuuti, 'ulinsila mughosi,' <sup>18</sup> Ulwakuva ulyatolilue na vaghosи vahano, ghwope junو ghukukala naghwo lino, naghwako. Mu ulu ujovile isa kyang'haani!”

<sup>19</sup> Umukijuva jula akamwamula akati, “Ghwe Ntwa, nivona uve uli m'bili. <sup>20</sup> Avakuulu viitu valyale vikumwimika uNguluve pa kidunda iki, neke umue mwiti ku Yelusalemu kwe kuno kunoghiile kukumwimika uNguluve.”

<sup>21</sup> UYesu akam'buula akati, “Ghwe mukijuva uve, ghwitikaghe sino nijova, ghukwisa unsiki ghuno namukumwimikagha uNguluve uNaata pa kidunda iki nambe ku Yelusalemu. <sup>22</sup> Umue mu kumwimika uNguluve junо namunkagwile, neke usue tukumwimika uNguluve junо tankagwile, ulwakuva uNguluve ikuvapokea avaanhу kukilila ku Vayahudi.” <sup>23</sup> Lino unsiki ghukwisa, kange ghufikile, pano avaanhу vano vikumwitika uNguluve uNaata mu vwakyanghaani, vikumwimikagha mutwa kulongosivua nu mhepo ghwake na vule vulungika uvwakyang'haani vwake. <sup>24</sup> UNguluve ghwe mhepo, avaanhу vano vikumwimika umwene, vanoghiile kukumwimika mu ngufu

isa mhepo ghwake na mu vwakyang'haani.”  
 25 Umulijuuba jula akamwamula akati, “Nikagwile kuuti uMesiya, (juno ghwe Kilisite). Ikwisa iliva isile, ujuo ilikutuvuula sooni.  
 26 UYesu akam'buula akati, “Une ne juno nijova nuuve, neene Mesiya.” 27 Unsiki ughuo avavulanisivua vaake vakagomoka, vakadegha kyongo kuvona uYesu ijoba nu mukijuuba, neke nakwealyale juno alyaghelile kukumposia kuuti, “Ghulonda kiki?” nambe kuuti “Kiki ghujova naghwo?” 28 Umukijuuba jula akaluleka pala pala ulusaaji lwake ulwa malenga akaluta kukikaaja, akavavuula, avanu akati, 29 “Mwise mulole umuunhu juno ambulile sooni sino nivobile. Asi umuunhu ujuo ndepoonu iiva ghwe Kilisite?” 30 Avaanu yepulike isio vakaluta kuno kwale uYesu. 31 Unsiki ughwa pamwisi avavulanisivua vaake vakam'buula uYesu vakati, “Ghwe m'bulanisi ulie ikyakulia.” 32 Umwene akavavuula akati, “Une nili ni kyakulia kino umue namukikagwile.” 33 Avavulanisivua vaake vakanengula kuposania viiti, 'Asi, kuli muunhu isile vwa Nhaata, juno kukumuletela ikyakulia?”  
 34 UYesu akavamula akati, “Ikyakulia kyango une, kwe kuvomba isa vughane vwa Nhaata juno asung'hulile nimale imbombo jaake.  
 35 Asi, namwamujova kuuti, “Gasighile ameesi ghahaano kupeta?” Neke une nikuvavuula niiti, lola amaghunda vule ghalivuo pano lukwilene kupeta! 36 Ghwope juno ipeta ikwupila uluhombo lwake, umpeto ve vaanhу vano vikwupila uvwumi uvwa kuvusila kusila, apuo juno ivyala na juno ipeta vooni vivisaghа nu

lukeelo palikimo. <sup>37</sup> Kwelule ulujovo luno luuti, 'Jumonga ivyala ujunge ipeta ulujovo uluo lwa kyang'haani.' <sup>38</sup> Une nivasunghile umue kupeta fino namuhangajikile, Avange vakavombile imbombo inalamu, umue mupeta vwinila imbombo jaave." <sup>39</sup> AVasamalia vinga ava mulikaaja lila ilya sikali vakamwitika uYesu ulwakuva valyapuliike sino alyajovile umukijuua jula kuuti, "Umuunhu ujuo ambulile sooni sino nivombile." <sup>40</sup> Pe aVasamalia vala vakafika pano pwale uYesu vakampelepesia kuuti ikale palikimo na veene, pe akikala mu likaaja ilio ifighono fivili. <sup>41</sup> Avaanhu vinga fijo vakamwitika uYesu vwinila ilisio lyake. <sup>42</sup> Vakam'buula umukijuua jula vakati, "Lino nakwekuti tumwitiike umuunhu uju vwinila si sino utuvulile uve, looli tumwitike ulwakuva tupulike sino ajovile, kange tukagwile kuuti kyang'haani umuunhu uju ghwe mpoki ghwa vaanhу vooni." <sup>43</sup> Ifighono fivili ye fikilile, akavuuka kiluta ku Galilaya. <sup>44</sup> UYesu alyoliike kuuti um'bili naikwoghopua na vaanhу ava mu kikaaja kyake. <sup>45</sup> Avaanhu ava ku Galilaya valyamwipiile uYesu, ulwakuva valyasivwene sooni sino alyavombile ku kyimike ikya Pasaka ku Yelusalemu, kukyimike ukuo voope kwevalyale. <sup>46</sup> UYesu akaluta kange ku kikaaja ikya Kana mu kighavo ikya Galilaya. Kukikaaja ikio kwe kuno alyahambwisie amalenga kuuva luhuuje kwe alyale umulongosi jumonga ughwa selikali ku Kapelnaumu, umulongosi ujuo umwanaake alyale ntamu. <sup>47</sup> Ye apulike kuuti uYesu isile kange ku Galilaya

kuhuma ku Yudea akaluta kukumpelepesia uYesu kuuti alute ku Kapelenamu, ansosi umwanaake ulwakuva umwanaake ujuo ghulyale ghukova. <sup>48</sup> UYesu akamwamula akati, “Umue namunganyitike kisila kufyagha ifivalilo ni fidegho. <sup>49</sup> Umulongosi jula akamwamula akati, “Ghwe Mutwa nikukusuma luvuke unsosie umwanango pano akyale pifua.” <sup>50</sup> UYesu akam’buula akati, “Vujagha, umwanaako asokile.” Akitika amasio gha Yesu akavuuka ivuja. <sup>51</sup> Umulongosi jula ye ali mu sila ivuja, akatang’hana na vavombi vaake vakambuula vakati umwanaako asokile nkafu. <sup>52</sup> Pe akavaposia akati. Asokile unsiki ghuliku, “Aveene vakamwamula vakati, asooka pamithe pamwisi akavalilo aka lekela lubale.” <sup>53</sup> Uviise ghwa mwana jula akakagula kuuti asooka unsiki ghula ghuno uYesu ajova kuuti, “Umwanaako asookile.” Pe umwene palikimo na vaanhу vooni ava munyumba jaake vakamwitika uYesu. <sup>54</sup> Ikidegho ikio kyale kivalilo kya vuvili kino alyavombie uYesu ku Galilaya ye ahumile ku Yudea.

## Sura ya 5

- <sup>1</sup> Pambele uYesu akaluta kulikaaja ilya Yelusalemu ku kikulukulu ikya Vayahudi.
- <sup>2</sup> Mu likaaja ilio pweghulyale umulyango um’baha ghuno ghukatambuluagha, mulyango ghwa ng’holo, piipi nu mulyango ughuo pwelilyale ililamba lino munjovele ija Kiebulania likatambulwagha Bethzatha, mulubale mulilamba ilio pweflyale ifibalasa fihano

ifyeleefu. <sup>3</sup> Mu lusulua ulwa fibalasa ifio valyaghonile avatamu vinga, avabofu amaaso, avalema amaghulu, na vanya liteela. (Vingilila: Amasio agha kadebe aka 3 naghivoneka mu malembe amanofu amakuulu. “Vakaghulagha amalenga ghatimbusivue.”) <sup>4</sup> Mu uluo, juno akavisagha ghwa kwasia kukwingila pano amalenga ghatimbwike, alyale isooka inhamu jaake. <sup>5</sup> Lino palilamba pala pwealyale umuunhu jumonga juno alyale ntamu amaaka fijigho fitatu na lekelakwoni. <sup>6</sup> UYesu akamwagha umuunhu ujuo aghonile pala alyakagwile kuuti umuunhu ujuo inhamu jaake ja maaka minga, akamposia akati, “Asi ghulonda kusooka?” <sup>7</sup> Untamu jula akamwamula akati, “Ghwe Ntwa, amalenga ghangatimbusivue, nkware umuunhu ughwa kumbiika mu lilamba. Pano nilonda kukwingila mu lilamba ye nivonagha umuunhu ujunge anhalilile pikwingila.” <sup>8</sup> Pe pano uYesu akam’buula akati, “Ima veghala iliteefu lyako vujagha.” <sup>9</sup> Pala pala umuunhu jula akasooka, akaveghala iliteefu lyake, akavuuka iluta. Ikighono ikio jaale Sabato. <sup>10</sup> Pe aVayahudi vakam’buula umuunhu jula juno asokile vakati, “Umusyughu kighono kya Sabato, indaghilo na sikwitikisia kupiinda iliteefu.” <sup>11</sup> Neke umuunhu jula akavamula akati, “Umuunhu juno asosisie ghwe mwene ambulile kuuti, ‘Veghala iliteefu lyako vujagha.’” <sup>12</sup> Vakamposia kange vakati, “Ghwe veeni juno akuvulile kuuti ‘Veghala iliteefu lyako vujagha?’” <sup>13</sup> Neke umuunhu jula naalyammanyile juno ansosisie ulwakuva uYesu

alyavukile kisyefu. Ulwakuva avaanu valyale vinga. <sup>14</sup> Pambele uYesu akamwagha umuunhu jula munyumba inyimike ija kufunyila, akambuula akati, “Lolagha lino usokile! “Nungavombaghe inyivi kange nave ghuvomba lukukwagha ulutalamu ulukome kukila ulwa kwanda.” <sup>15</sup> Umuunhu jula akavuuka pala akaluta kukuvaruula aVayahudi kuuti juno ansosisie ghwe Yesu. <sup>16</sup> Pepano, vwimila amasio aghuo aVayahudi vakampumwisie uYesu, ulwakuva alyavombile isio mu kighono ikya Sabato. <sup>17</sup> Neke uYesu akavavuula akati, “UNhaata ghwango ivomba imbombo ifighono fyoni, na juune nivomba imbombo ifighono fyoni.” <sup>18</sup> Vwimila uluo aVayahudi vakava vighina kulonda isila ija kum'buda uYesu vakalonda kukum'buda ulwakuva vakatisagha adenyle ululaghilo lwa kighono ikya Sabati, kange ijoba kuuti, uNguluve ghwe viise, kange ikuviika kuuti aling'hiine nu Nguluve. <sup>19</sup> UYesu akavavuula akati, “Kyang'haani nikuvavuula une ne mwanaake nanivomba lumonga vwimila amasaaghe ghang, looli nivomba si sino nikumwagha uNhaata ivomba, nijova uluo, ulwakuva sino ivomba uNhaata se sino najune ne mwanaake nivoomba. <sup>20</sup> UNhaata anganile une ne mwanaake, ikuhofia sooni sino ivomba umwene, kange ilikuhufia une imbombo sino ilonda nivombe, imbombo imbaha kukila isio, kuuti pe mudeghe fijo. <sup>21</sup> Ndavule uNhaata vule ikuvasyusia avafue na kukuvapeela uvwumi, fye enendiiki na juune nikuvapeela uvwumi, vano nilonda kukuvapeela. <sup>22</sup> Ulwakuva uNhaata

naihigha muunhu, looli ampeliile umwanake uvutavulilua uvwa kuhigha,<sup>23</sup> Kuuti avaanhu vooni vamwoghopaghe ndavule vikumwoghopa umwene. Umuunhu juno naikumwoghopa umwanake naikumwoghopa uNhata juno ansung'hile.<sup>24</sup> Kyang'haani nikuvavuula, umuunhu juno ipulika amasio ghango na kukumwitika uNguluve juno asung'hile ali nu vwumi uvwa fighono fyoni. Kange nailihighua. Looli ujuo akilile uvufue na kukwingila ku vwumi uvwa kuvusila kusila.<sup>25</sup> Kyang'haani nikuvavuula, unsiki ghukwisa, kange ghufikile, avafue vilipulika, viliiva nu vwumi uvwa kuvusila kusila.<sup>26</sup> Nijo uluo ulwakuva ndavule uNhaata vule ali ni ngufu isa kumpeela umuunhu uvwumi uvwa kuvisila kusila, najuune amheliile ingufu isa kuvapeela avaanhu uvwumi uvuo.<sup>27</sup> Kange, amheliile uvtavulilua uvwa kuhigha avaanhu, ulwakuva une nili, Mwana ghwa Muunhu.<sup>28</sup> Namungadeghaghe amasio aghuo, ulwakuva ghukwisa unsiki ghuno avafue vooni vilipulika ing'hemeelo jaango.<sup>29</sup> Avafue vilisyuka: vano vavombagha inofu viiva nu vwumi uvwa fighono fyoni, vano vavombagha uvuhosi vilihighua.<sup>30</sup> UYesu akafijovagha akati une nanivomba kimonga vwimila amasaaghe ghango, une nihigha avaanhu ndavule ikumbuula uNhata. Nihigha mu vwakyang'haani, ulwakuva nanivomba muvughane vwango, looli mu vughane vwa Nguluve juno asung'hile.<sup>31</sup> Nave une nikujoleka juune, uvwolesi vwango navwale

vuuva vwa kyang'haani. <sup>32</sup> Looli kwale ujunge juno ikwoleka imhola sango na juune nikagwile kuuti sino ikwoleka vwimila une sa kyang'haani. <sup>33</sup> Umue mulyasung'hile avaanhу kwa Yohani umwofughi, ghwope alyavoliike isa kyang'haani vwimila une. <sup>34</sup> Neke une nanihuvila sino vikwoleka avaanhу, ulwene nijova isi kuuti mukave uvupoki. <sup>35</sup> UYohani umwofughi alyahufisie uvwakyang'haani kulyumue, ndavule itaala vule jiviika na kumulika mung'hiisi, umue mulyahovwike vwimila uluo ku nsiki ndebe. <sup>36</sup> Neke une nili ni mhola sino sikunyoleka fijo kukila sino alyoliike uYohani, ulwakuva imbombo sino nivomba, sino alyamheliile uNhaata kuuti nivombe, se sino sikunyoleka kuuti uNhaata juno asung'hile. <sup>37</sup> Ghope uNhaata juno asunghile une, ikwoleka imhola sango. Umue namughelile nambe lusiku kupulika ilisio lyake, kukumwagha vule alivuo unsiki ghwoni. <sup>38</sup> Kange imbulanisio saake nasili nkate mulyumue ulwakuva namukumwitika juno asung'hilue kulyumue. <sup>39</sup> Mughimba kulolesia mu malembe amimike, ulwakuva musagha kuti nkate umuo mukava uvwumi uvwa kuvusila kusila, amalembe aghu ghikunyoleka une. <sup>40</sup> Neke umue namulonda kukwisa kulyune, kuuti mu pelue uvwumi uvwumi uvwa kuvusila kusila. <sup>41</sup> Une nanihuvila avaanhу vanginie, <sup>42</sup> neke nikagwile kuuti nkate mulyumue namuli nu lughano lwa Nguluve. <sup>43</sup> Une nisile mu vutavulilua uvwa Nhaata ghwango, umue namukunyupila. Neke ujunge

angiise mu vutavulilua vwake jujuo, mwale mukumwupila. <sup>44</sup> Lino ndepoonu mukunyitika ndaani umue mwe vano mulonda kughinisivua na vaanhу, namulonda kughinisivua nu Nguluve juno ali jumo mwene? <sup>45</sup> Mulekaghe piiti ue nilikuvatwala kwa Nhaata avahighe. UMoose ghwe juno ilikuvatwala muhighue ulwakuva ghwe juno mukumhuviila. <sup>46</sup> Musava mukumwitika uMoose, ngale mukunyitika na juune, ulwakuva alyalembile imhola sango. <sup>47</sup> Neke nave namukwitika amasio ghano alyalembile uMoose, ndepoonu mukwitika ndaani amasio ghango?

## Sura ya 6

<sup>1</sup> Pambele uYesu akalovoka ilisumbe ilya Galilaya, ilisumbe ilio ilitavua ilingi likatambul-wagha Tibelia. <sup>2</sup> Avaanhу vinga vakam'bingilia uYesu, ulwakuva valyale vikufyagha ifivalilo kukilila ifidegho fino avombagha mulwa kusosia avatamu. <sup>3</sup> Pe uYesu na vayulanisivua vaake vakatogha ku kidunda, vakikala ukuo. <sup>4</sup> (Unsiki ughuo, ikyimike kya Pasaka kilyale piipi). <sup>5</sup> UYesu akalivona ilipugha lya vaanhу likwisa kwa mwene, pe akamposia uFilipo akati, "Ndepoonu tughula kuughi amakate, kuuti avaanu avavalie"? <sup>6</sup> (UYesu akamposia enendiki kukumughela, ulwakuva umwene alyakagwile kino iluta pivomba). <sup>7</sup> UFilipo akamwamula akati, "Nambe twale tuuve ni ndalama nyinga idinali filundo fivili kughula amakate, amakate aghuo naghaale ghikwila kukumpeela nu junge

akamenyule akadebe.” <sup>8</sup> Pe u Andleya, umo mu vavulanisivua vaake, unnuuna ghwa Simoni u petelo, akam’buula uYesu akati, <sup>9</sup> “Pwale apa umwana jumonga ali na makate ghahaano agha ngongilue ni samaki ivili. Neke ifyakulia ifi fitanga kiki ku vaanhу avinga ava?” <sup>10</sup> UYesu akavavuula avavulanisivua vaake akati, “Muvakasie avaanhу” (Pe avaanhу vala vakikala apoonu pala pano valikalile) palyale pe lusoli, mulipugha lila avakinhaata veene valyale imbilima ihaano. <sup>11</sup> Pe uYesu akatoola amakate ghalা, akamhongesia uNguluve, akavaghavila avaanhу vooni vano pwevale pala. Akatoola isamaki akavomba vule vule, Nu junge akapelua ndavule avele ilonda. <sup>12</sup> Avaanhу vooni yevikwite, uYesu akavavuula avavulanisivu vaake akati, “Mukong’hanie ifisighasi fyonи, kileke kusova kimonga.” <sup>13</sup> Pe vakakong’hania ifisighasi ifya makate ghalা agha ngongilue, vakamemia indiilo kijighо ni vili. <sup>14</sup> Avaanhу vala ye vakyaghile ikidegho kino avombile uYesu vakati, “Kyang’haani umuunhu uju ghwe mbili juno twahuvilagha kuuti ikwisa mu iisi muno.” <sup>15</sup> UYesu akakagula kuuti vilonda kukumwumilia aave ntwa ghwave akavuuuka pala, akaluta kange kukidunda, ukuo akava mwene. <sup>16</sup> Ye vwilile, avavulanisivua vaake vakiika vakaluta ku lisumbe. <sup>17</sup> Vakingila mu Ngalava vakaten-gula kulovoka ilisumbe kuluta ku Kapelenamu. (Unsiki ughuo jilyale ng’iisi neke uYesu alyakyale kufika pa veene). <sup>18</sup> Ilisumbe likatengula kusambaluka ulwakuva imhepo imbaha jikava jigugula. <sup>19</sup> Avavulanisivua va Yesu ye vaghen-

disie ingalava ikilomita ihano nambe ntanda ndiiki, vakamwagha uYesu ighenda pakyanya pa malenga alipiipi ni ngalava vakoghopa kyongo. <sup>20</sup> UYesu akavavuula akati, “Namungoghopaghe, neene!” <sup>21</sup> Pe aveene vakalondagha kuuti ingile mu ngalava, nakalingi ingalava jikafika imwambo jino vakava viluta. <sup>22</sup> Ikighono ikivingilili, avaanhу vingа vanо valyajiighe imwambo ijingi ija lisumbe, vakajaagha pala ingalava jimo jeene. Kange vakakagwile kuuti uYesu naavuka na vavulanisivua vaake ye viluta ni ngalava ulwakuva avavulanisivua vaake vakalutile veene. <sup>23</sup> (Pe avaanhу aange vakiisa ni ngalava isingi kuhuma kulikaaja ilya Tibelia vakafika pano avaanhу vakaliile amakate uYesu ye amhongisie uNguluve). <sup>24-25</sup> Avaanhу vala ye vakagwile kuuti uYesu na pwale pala nambe avavulanisivua vaake, vakingila mu ngalava sila vakaluta ku Kapelenamu kukumulonda uYesu. Avaanu vala ye vafikile imwambo ija lisumbe vakamwagha uYesu vakamposia vakati, “Ghwe m'bulanisi ghwisalighi kuno?” <sup>26</sup> UYesu akavamula akati, kyang'haani nikuvavuula, nakwekuti mukundonda ulwakuva mwafyagha ifivalilo kukilila ifidegho fino navomba, ulwene mukundonda ulwakuva mwalia amakate mukuta. <sup>27</sup> Namungatungumalilaghe ikyakulia kino kinangika, looli ikyakulia kino nakinangika, kino kikukupeela uvwumi uvwa kuvusila kusila, ikyakulia ikio kyekino une ne mwana ghwa muunhu nikuvapeela, ulwakuva uNguluve uNhata ahufisie kyang'haani kuuti une neene ghwa kuvomba imbombo igio.” <sup>28</sup> Pe aveene vakam-

posia vakati, “Tukite kiki neke tuvombe im-bombo sino ikeela uNguluve?”<sup>29</sup> UYesu akavamula akati, “Imbombo jino ikela uNguluve je iji: Munnyitikaghe une ne juno nisunghilue nu mwene.”<sup>30</sup> Vakam’buula vakati, “Ghuhufia iki-valilo kiki tukyaghe neke twitike? Lino ghuhufia ikivalilo kiki?”<sup>31</sup> Avakuulu viitu ye vali ku lukuve, valyaliile imana, ndavule lilembilue mu malembe amimike kuuti, “Alyavapeliile amakate kuhuma kukyanya.”<sup>32</sup> UYesu akavavuula akati, “Kyang’haani nikuvavuula, uMoose naghwe juno alyavapeliile amakate kuhuma kukyanya, looli ghwe Nhaata juno lino ikuvapeela amakate agha kyang’haani ghano ghihuma kukyanya.<sup>33</sup> Nijova uluo ulwakuva unkate ughwa kyang’haani neene ne juno uNguluve asung’hile kuhuma kukyanya kukuvapeela avaanhу uvwumi uvwa kuvusila kusila.”<sup>34</sup> Pekambuula vakati, “Ghwe Mutwa, tusuma utulaghe jaatu unkate ughuo.”<sup>35</sup> UYesu akavavuula akati, “Une neene nkate ghuno ghukuvapeela avaanhу uvwumi, umuunhu juno ikwisa kulyune, injala najilam'bava lusiku juno ikunyitika, ikyumilua nakilamwagha lusiku.”<sup>36</sup> Neke nivavuulile kuuti napano munyaghile, mujiighe namukunyitika.<sup>37</sup> Avaanhу vooni vano uNhaata ikumeela, vikwisa kulyune na kukunyitika, juno ikwisa kulyune nanilantaagha lusiku.<sup>38</sup> Nijova uluo ulwakuva une nisilie kuhuma kukyanya kuuti nivombage isa vughane vwa Nhaata juno asung’hile, nanisile kuvomba isa vughane vwango.<sup>39</sup> Uvughane vwa Nhaata juno asung’hile vwe uvu, nileke kusofia nambe jumo mu vano amheliile, looli nivasyusie

ikighono ikya vusililo. <sup>40</sup> UNhaata ghwango ilonda kuuti, umuunhu juno akagwile kuuti une nili mwanaake na kukunyitika upile uvwumi uvwa kuvusila kusila: Na juune nilikunsyusia ikighono ikya vusililo. <sup>41</sup> Pe aVayahudi vakatengula kukung'hulasia ulwakuva uYesu ajovile kuuti, "Une neene nkate ghuno uNguluve aletile kuhuma kukyanya." <sup>42</sup> Vakiposania veene viiti, "Asi umuunhu uju naghwe Yesu umwana ghwa Yosefu, avapaafi vaake tuvamanyile? Lino lwendaaani iti ahumile kukyanya?" <sup>43</sup> UYesu akavamula, akati, "Muleke pikung'hulasia. <sup>44</sup> Nakwale umuunhu juno ndepoonu ikwisa kulyune, nave uNhata juno asung'hile une naamulongwisie, na juune nilikunsyusia umuunhu ujuo ikighono ikya vusililo. <sup>45</sup> Um'bili jumonga alyalembile mu malembe amimike kuuti, 'Vilivulanisivua nu Nguluve.' Umuunhu juno ikumpulikisia uNhaata na kumanyila kwa mwene, ikwisa kulyune. <sup>46</sup> Nakwale umuunhu juno amwaghile uNhaata, looli une neene nimwaghile ulwakuva nihumile kwa mwene. <sup>47</sup> Kyang'haani nikuvavuula, umuunhu juno ikunyitika une, ali nu vwumi uvwa kuvusila kusila. <sup>48</sup> Une neene nkate ghuno ghukuvapeela avaanhу uvwumi. <sup>49</sup> Avakuulu viinu nambe valyaliile imana ku lukuve, valyafwile. <sup>50</sup> Neke apa pweghule unkate ghuno ghuhumile kukyanya, umuunhu angalie, naifu. <sup>51</sup> Une neene nkate ghuno ghuhumile kukyanya. Umuunhu juno ilia unkate ughu, iiva nu uvwa uvwa kuvusila kusila. Unkate ughuo ghwe m'bili ghwango ghuno nitavula kuuti avaanu vooni vavisaghe

nu vwumi uvwa kuvusila kusila. <sup>52</sup> Avayahudi vakatengula kukang'hana na kuposania veene viiti, "Asi umunhu uju ikutupeela ndaani um'bili ghwake tulie?" <sup>53</sup> UYesu akavavuula akati, "Kyang'haani nikuvavuula, nave namulia um'bili ghwango ne mwana ghwa muunhu, na kunyua idanda jango, namuuva nu vwumi uvwa kuvusila kusila. <sup>54</sup> Umunhu juno ilia um'bili ghwango na kunyua idanda jango, ali nu vwumi uvwa kuvusila kusila, na juune nilikunsyusia ikighono ikya vusililo. <sup>55</sup> Nijova uluo ulwakuva um'bili ghwango kye kyakulia ikya kyang'haani, naji danda jango jivusia ikyumilua kyang'haani. <sup>56</sup> Juno ilia um'bili ghwango na kunyua idanda jango ujuo ikukala mulyune, na juune nikukala mwa mwene. <sup>57</sup> Ndavule uNhaata juno asung'hile vule mwumi, na june nili mwumi mu ngufu saake, fye enendiiki kwa muunhu juno ilia um'bili ghwango, iiva mwumi mu ngufu sango. <sup>58</sup> Une nili nkate ghuno ghuhumile ghuhumile kukyanya, naghuli ndavule unkate ghuno avakuulu viinu valyaliile, vakafua. Umunhu juno ilia unkate ughu iiva nu vwumi uvwa kuvusila kusila. <sup>59</sup> UYesu alyajovile amasio aghuo ye ali pivulanisia mu sinagogi, ku Kapelenamu. <sup>60</sup> Avaanhu vinga mu vavingilili vaake ye vapuliike isio, vakajova vakati, "Imbulanisio isi nhalamu kyongo, ghwe veeni juno ndepoonu ikwupila imbulanisio isio?" <sup>61</sup> UYesu ye alutang'hinie kuuti avavingilili vaake vikung'hulasia vwimila imbulanisio isio, akavaposia akati, asi ilisio ili likuvakuvasia? <sup>62</sup> Pe luliiva ndaani mliiva mukunyaagha ne

mwana ghwa muunhu nitogha kuluta kukyanya kuno nilyale ulutasi? <sup>63</sup> Umhepo ghwa Nguluve ghwe juno ikuvapeela avaanhу uvwumi uvwa fighono fyoni. Ingufu sa muunhu nasingampeele umuunhu uvwumi. Amasio ghano nivavulile ghikuvapeela umue kuuva nu mhepo ghwa Nguluve, ghwope ikuvapeela uvwumi. <sup>64</sup> Neke pwevale vamonga pakate palumue vano navikunyitika.” Ulwakuva alyakagwile kuhuma kuvutengulilo ve va veeni vano navikumwitika, kange ghwe veeni juno ilikumwohela. <sup>65</sup> Pe akafijovagha akatisagha, fye nambe nivavulile kuuti, nakwale umuunhu juno ndepoonu ikwisa kulyune nave uNhaata naamulongwisie.” <sup>66</sup> Kuhuma unsiki ughuo vinga mu vavingilili vaake vakamuleka vakavuhiila kukum'bingilila. <sup>67</sup> Pe uYesu akavaposia avavulanisivua vala kijigho na vavili akati, “Asi najumue mulonda pikundeka?” <sup>68</sup> USimoni uPeteli akamwamula akati, “Ghwe mutwa, tukuleke tulute kwani uve uli na masio ghano ghikutupeela uvwumi uvwa kuvusila kusila. <sup>69</sup> Usue tukwitika kange tukagwile kuuti uve veeve mwimike kuhuma kwa Nguluve.” <sup>70</sup> Pe pano uYesu akavavuula akati, “Asi nanivasalwile umue, kange jumonga pakate palyumue ilongosivua nu Setano? <sup>71</sup> Apuo uYesu alyale ikunjova uYuda umwana ghwa Simoni uIsikalioti, ulwakuva napano alyale umo mu vavulanisivua kijigho na vavili, ghwe juno ilikumwohela.

## **Yohani 7**

<sup>1</sup> Pambele uYesu atakaluta mufikaaja ifya mu

kighavo ikya Galilaya, naakalondagha kuluta kukighavo ikya Yudea, u'wakuva aVayahudi vakalondagha kukum'buda. <sup>2</sup> Unsiki ughwa kikulukulu kya Vayahudi ikya fyeve, ghulyale piipi kufika. <sup>3</sup> Avanuuna va Yesu vakam'buula uYesu vakati, "Lino uvuuke apa, ulute kukighavo ikya Yudea kuuti avavingilili vaako vafyaghe ifidegho fyako fino ghuvomba. <sup>4</sup> Umuunhu juno ilonda kukagulika, naivomba imbombo saake kuvusyefu, lino ulwakuva ghuvomba isi sooni, ghuhufie kuvaanhу vooni." <sup>5</sup> Avanuuna valyajovile enendiiki, ulwakuva voope navalyamwitiike. <sup>6</sup> Pe uYesu akavavuula akati, "Unsiki ghwango ghukyale pifika, looli umue ndepoonu muluta amasiki ghooni. <sup>7</sup> Avaanhu ava mu iisi muno navangavakalalile umue, looli vikung'halalila une, ulwakuva nikuvaavuula kuuti, sino vivoomba mbiivi. <sup>8</sup> Umue lutaghi kukikulukulu ikio; une naniluta ulwakuvaunsiki ghwango ghukyale pifika. <sup>9</sup> U Yesu ye ajovile aghuo akajigha mu kighavo ikya Galilaya. <sup>10</sup> Neke avanuuna ye valutile ku kikulukulu, ghwope u Yesu akaluta, neke akaluta kisyefu, kisila kuhufia kuvaanhу. Kukikulukulu ukuo, <sup>11</sup> aVayahudi vakava vikumulonda u Yesu viposia kuvaanhу vitii, "Alikuughi?" <sup>12</sup> Avaanhu vinga mulipugha lila. Vakava vikujovalia, vamo vitii, "Umuunhu ujuo nnofu." Avange vitii, "Ndali, umuunhu ujuo isofia avaanhu." <sup>13</sup> Neke nakwealyale umuunhu juno alyale ijoba imhola saake pa vuvalafu, ulwakuva vakoghopagha aVayahudi. <sup>14</sup> Pakate pa fighono ifya kikulukulu u Yesu akingila mu luvika ulwa nyumba

inyimike ija kufunyila, akatengula kuvulanisia avaanhу. <sup>15</sup> Avayahudi vakava videgha vitii, “Umuunhu uju akaghwile ndaani isi, kisila kwimba? <sup>16</sup> Pe pano U Yesu akavamula akati, “Imbulanisio soni nivulanisia na sango, looli sihumile kwa junu asung’hile. <sup>17</sup> Umuunhu junu ilonda kuvomba isa vughane vusa Nguluve, ikagula kuuti imbulanisio isi sihumile Nguluve, nambe kuuti nijova muvutavulilua vwango june. <sup>18</sup> Umuunhu junu ijoba muvutavulilya vwake jujuo, ilonda avaanhу vamug’hiniaghe. Neke umuunhu junu ilonda vamughiniaghe junu ansunghile, ujuo ijoba isa kyang’haani, naijoba isa vudesi. <sup>19</sup> U Moose naalyavapeliile umue indaghilo? Neke nakwalemambe jumo pakate palyumue junu ivingilila indaghilo isio. Lino kiki milonda pikumbuda?” <sup>20</sup> Avaantu mu lipugha lila vakamwamula vakati, “Uli ni lipepo uve. Ghwe veeni junu ilonda pikukubuda?” <sup>21</sup> U Yesu akavamula akati, “Une nikavombile ikidegho kimo, umue mweni mukakenye-muka. <sup>22</sup> U Moose ayalaghiile kuvomba ikivungo ikya kudumula ingola ija kidiimi avaana viinu. Ululaghilo uluo nalulyahumile kwa Moose, looli lulyahumile kuvakuulu viinu. Umue muvomba uluo nambe nambe kive kighono kya Sabati. <sup>23</sup> Lino nave lukwitikisivua umwana kuvombelua ikivungo ikio mukighono ikya Sabati kuuti muleke kudeenya ululaghilo ulwa Moose, kiki mukung’halalila une. Kukunsosia umuunhu mu kighono ikya Sabati? <sup>24</sup> Mulekaghe kuhiga umuunhu mulwa kulola pamaaso, looli muhighaghe mu vwakyang’haani. <sup>25</sup> Avaanhу vamonga

ava mu likaaja ilya Yelusalemu vakava vipersania vitii, Asi, umuunhu uju naghwe juno avalongosi va Vayahudi vilonda kukumbuda? <sup>26</sup> Lolagha ijova pa vuvalafu, neke avene naijova kimonga! Pamo aveene avolongosi vitii umuunhu uju lweli ghwe Kilisite! <sup>27</sup> Ukilisite iliiva ikwisa nakwale nambe muunhu juno ilikagula kuno ihumila! Umuunhu uju kuno ihumatukagwile. <sup>28</sup> U Yesu ye ajhighhe ivulanisia mu luvika ulwa nyumba inyimike ija kufunyila, akajova fijo akati, “Lweli umue mweni mung'haghwile une, kange mukaghwile kuno nihuma. Nambe mwiti mukagwile uluo, <sup>29</sup> une nanilisile mu vutavulilua vwango, ulwene juno asung'hile une ghwa kyang'haani, umue namunkagwile. <sup>30</sup> Une ninkagwile ulwakuva nihumile kwa mwene, kange ghwe juno asung'hile. Pepano vakava vilonda kukunkola, neke nakwealyale umuunhu juno akaghela kukunkola, ulwakuva unsiki ghwake ughwa kukolua ghulyakyale kufika. <sup>31</sup> Avaanhu vinga mu lipugha lila vakamwitika. Vakava ijova viiti, “Iliiva ikwisa uKiliste ilivomba ifidegho kukila fino avobile uju?” <sup>32</sup> Avafalisayi vaka-pulika ilipugha lya vaanhу vipwepa vwimila imhola sa Yesu, pe avavaha va vatekesi na Vafalisayi vakasuung'ha avasikali kuuti vankole. <sup>33</sup> Pepano uYesu ajajova akati, “Niiva numue unsiki n'debe vuvule, neke pambele nigomoka kwa juno asun'ghile. <sup>34</sup> Mulikundoonda, neke namulikunyaagha, kange kuno niliiva, umue namungafike.” <sup>35</sup> Pe aVayahudi vakava vipersania viiti, “Umuunhu uju iluta kuughi kuno usue

natunga mwaghe? Asi, iluya ku vano Vapalasiine vano nkate mu vaYunani na kukuvavulanisia avaYunani? <sup>36</sup> Asi, kwe kuti kiki pano iiti, 'Mulikundonda, neke namulikunyaagha, kange kuno niliiva umue namungafike?" <sup>37</sup> Ikighono ikya vusililo ikya kikulukulu kya fyeve, kino kilyale kighono kivaha, uYesu akiima akajova fijo akati, "Umuunhu nave ali ni kyumilua, iise kulyune anyue. <sup>38</sup> Umuunhu juno ikunyitika une, iiva ndavule ghijova amalembe amimike kuuti, isaasa isa malenga amanya vwumi sid-wivuka mu mwojo ghwake. <sup>39</sup> Alyajovile uluo mu mhola ija mhepo uMwimike, juno avaanhu vano vikumwitika vilikumwupila pambele, unsiki ughuo, uNguluve alyakyale kukunsuung'ha umhepo ghwake, ulwakuva alyakyale kuhufia kuvaanu uvuvaha vwa Yesu. <sup>40</sup> Avaanhu vamonga mu lipugha lila ye vapuliike amasio aghuo, vakati, "Kyang'haani, umuunhu uju m'bili." <sup>41</sup> Vamonga vakati, "Umuunhu uju ghwe Kilisite." Neke avange vakati, "Ndali, uKilisite ndepoonu ihuma ku Galilaya? <sup>42</sup> Asi amalembe amimike naghiiti uKilisite ilihuma mu kikolo ikya ntwa u Daudi ku kikaaja ikya Bethelehemu, kikaaja kino alyale ikukukala untwa uDaudi? <sup>43</sup> Pepano avaanhu vakalekeng'hana vivimila uYesu. <sup>44</sup> Avaanu vamonga mu lipugha lila vakava vilonda kuku nkola, neke nakwealyale umuunhu juno akaghela kuku nkola. <sup>45</sup> Avasikali vala vakagomoka ku vavaha va vatekesi na kuVafalisayi, kisila kunkola uYesu. Avavaha vala vakavaposia vakati, "Kiki namunkolile na kukumuleeta?" <sup>46</sup> Avasikali vala vakamula vakati,

“Naaghelile kuhumila umuunhu juno ijoba ndavule umuunhu jula. <sup>47</sup> Avafalisayi vakavaposia vakati, “Kwekuti najumue musyangilue? <sup>48</sup> Asi ghwe veeni mu valongosi viitu nambe mu Vafalisayi juno amwitiike? <sup>49</sup> Ulwene avanu avuo avuo navasikagwile indaghilo sa moose, avuo vaghunilue.” <sup>50</sup> Pepano uNikodemu (umo mu valongosi va Vafalisayi, juno ikighono kimonga alyalutile kwa Yesu pakilo), akavaposia akati, <sup>51</sup> “Asi indaghilo siitu sikkwitikisia kukumhigha umuunhu kisila kumpulikisia na kukusitang’hania sino avobile?” <sup>52</sup> Aveene vakamwamula vakati, “Neke najuuve uhumile ku Galilaya? Londagha muMalembe amimike pekyaghukagula kuuti nakwale umbili juno ahumile ku Galilaya.” <sup>53</sup>\*

## **Yohani 8**

<sup>1</sup> \* U Yesu akaluta ku kidunda ikya Mis-eituni. <sup>2</sup> Palwakilo ye kukiile akagomoka kange mu nyumba inyimike ija kufunyila. Avaanu vinga vakaluta pa mwene, pe akikala, akatengula kukuvavulanisia. <sup>3</sup> Ye ivulanisia, avavulanisi va ndaghilo na Vafalisayi, vakamuleeta kwa mwene umukijuua jumonga juno aklilue ivwafuka, Vakambiika pakate pa lipugha lyuvaanhu. <sup>4</sup> † Pepano vakambuula uYesu

---

\* **Yohani 7:53** Vingilila: Ghamonga amasio mwa Yohana 7: 53 - 8: 11 namweghale mumalembe amakuulu). Pambele avaamu vooni vakaluta mumakaaja ghaave. \* **Yohani 8:1** Vingilila: Lola uvwolesi mwa Yohana 7:53 - 8:11 † **Yohani 8:4** Vingilila: Lola uvwolesi mwa Yohani 7:53 - 8:11.

vakati, “Ghwe M’bulanisi, umukijuuva uju akolilue ivwafuka. <sup>5</sup> Lino, uMoose mu ndaghilo saake, alyatulaghile kuuti umukijuuva ndavule uju, atovwaghe na mavue, uve ghwiti ndaani?” <sup>6</sup> Valyajovile isio kukumughela, kuuti vaave ni kiteghe ikya kumhighila. Neke uYesu akinama, akalemba ni kovye kyake pa lihanga. <sup>7</sup> ‡ Ye vajiighe vifikumposia, akinamuka, akavamula akati, “Unsila nkole pakate palyumue, ave ghwa kwanda kukuntova ni livue umukijuuva uju.” <sup>8</sup> Pe akinama kange, akalemba pa lihanga. <sup>9</sup> § Ye vapuliike uluo, vakaten-gula pivuuka jumo jumo, kutengulila avalugoyo kuhanga un’debe. Akajigha ju Yesu nu muki-juuva jula juno alyale pakate pa veene. <sup>10</sup> U Yesu ye ikwinamuka akamposia akati, “Muki-juuva, valikuughi vano vikukuhigha? Nakwale nambe jumo juno ikukuhigha? <sup>11</sup> Umukijuuva jula akamwamula akati, “Ghwe Mutwa, nakwale nambe jumo. Pepano uYesu akam’buula akati, “Na juune nanikukuhigha. Lutagha, looli kuhuma unsiki ughu, nungavombaghe inyivi kange.” <sup>12</sup> U Yesu akatengula pijova kange na vaanhу vala akati, “Une nili lumuli lwa iisi, umuunhu juno ikumbingilila une naighendagha mung’hiisi looli iiva nu lumuli luno lukumulongosia ku vwumi uvwa kuvusila kusila. <sup>13</sup> Avafalisayi vakam’buula u Yesu vakati, “Uvwolesi vwako navwa kyang’haani, ulwakuva ghukwoleka juuve imhola saako.”

---

‡ **Yohani 8:7** Vingilila: Lola uwwolesi mwa Yohani 7:53 - 8:11.

§ **Yohani 8:9** Vingilila: Lola uwwolesi mwa Yohani 7:53 - 8:11.

<sup>14</sup> UYesu akavamula akati, “Nambe nikwoleka juune imhola sango, uvwolesi vwango vwa kyang'haani, ulwakuva nikagwile kuho nihu-mile, na kuno niluta. Umue namukagwile kuno nihumile nambe kuno niluta. <sup>15</sup> Umue muhigha kulinghana na masaaghe ghiinu, neke une nanihigha muunhu. <sup>16</sup> Poope nambe ni-highhe, uvuhighi vwango vwa kyang'haani, ul-wakuva nanihigha ne mwene, looli nu Nhaata juno asung'hile une. <sup>17</sup> Mu ndaghilo siinu lilembilue kuuti, uvwolesi vwa vaanhu vavili, vwa kyang'haani. <sup>18</sup> Mu uluo, une nikujoleka, naju Nhaata juno asung'hile ikwoleka kuuti une neene veeni.” <sup>19</sup> Vakamposia vakati, uNhaata ghwako ali kuughi?” UYesu akavamula akati, “Umue namun'ghagwile, ghwope uNhaata namunkagwile. Mwale mung'hagule une, naju Nhaata mwale mukunkagula.” <sup>20</sup> uYesu alyajovile amasio aghuo ye ivulanisia piipi ni kyumba kino kikatambulwagha kyumba kya kuviika indalama munyumba inyimike ija kufunyila. Neke nakwealyale nambe muunhu ughwa kuhkola, ulwakuva unsiki ghwake ughwa kukolua ghulyakyale kufika. <sup>21</sup> Akavavuula kange akati, Une niluta, umue mulikundonda, neke mulifua mu vwinu. Kange kuno niluta une, umue namungafike. <sup>22</sup> Avayahudi vakaposania vakati, “kwe kuti ilonda pikubuda? Ongo iti kuno iluta natungafike?” <sup>23</sup> U Yesu akavavuula akati, “Umue muhumile mu iisi iji, une nihumile kukyanya. Umue muli va mu isi iji, une nanili ghwa mu iisi iji. <sup>24</sup> Fye nambe nivavuulile kuuti mulifua mu vuhosи vwinu.

Nave namukwitika kuuti UNE NEENE, mulifua mu vuhosи vwinu. <sup>25</sup> Pe vakamposia uYesu vakati, “Tuvuule, uve veeve veeni?” UYesu akavavuula akati, “kuhuma ulutasi nivavuulite kuuti neene veeni. <sup>26</sup> Nili ni nyanga isa kujova na kukuvaligha umue. Juno asung’hile ghwa kyang’haani, une nikuvavuula avaanhу mu iisi muno, sino nipuliike kwa mwene. <sup>27</sup> Aveene navalyalutang’hinie kuuti ijoba navo imhola isa Nhaata ghwake. <sup>28</sup> Pepano uYesu akavavuula akati, “Mungamwimike uMwana ghwa Muunhu, pepano kya mukagula kuuti UNE NEENE, kange mulikagula kuuti sooni sino nivomba, nanivomba muvughane vwango, looli nijova sino uNhaata ambulanisie. <sup>29</sup> Juno asung’hile une alipalikimo nuune, naandekile ne mwene, ulwakuva ifighono fyoni nivomba isa vughane vwake. <sup>30</sup> UYesu ye ijoba isio, avaanhу vinga vakamwitika. <sup>31</sup> Pe pano u Yesu akavavuula aVayahudi vala, vano vamwitike akati, “Nave mugadilila imbulanisio sango, muuva vavulanisivua vaango kyang’haani, <sup>32</sup> apuo mukuvukagula uvwakyang’haani, uvwakang’haani uvvo, vukuvaviika kuuva vaavuke. <sup>33</sup> Aveene vakam’buula vakati, “Usue tuli va kisina kya Abulahamu. Natughelile kuuva vakami va muunhu nambe lusiku! Lwandaani ghwiti usue tuvikua vaavuke?” <sup>34</sup> UYesu akavamula akati, “Kyang’haani nikuvavuula, umuunhu ghweni juno ivomba inyivi nkami ghwa nyivi. <sup>35</sup> Unkami naikukala munyumba ja ntwa ghwake ifighono fyoni, looli umwana ghwa ntwa ikukala ifighono fyoni. <sup>36</sup> Mu uluo, uMwana

angavapoke muuve vaavuke, muuva vaavuke kyang'haani.”<sup>37</sup> Nikagwile kuuti umue muli va kisina kya Abulahamu, neke mulonda pikum'buda ulwakuva namukwitika imbulanisio sango.<sup>38</sup> Une nikuvavuula sino nisivwene nu Nhaata ghwango, neke umue muvomba sino mupuliike kwa nhaata ghwinu.”<sup>39</sup> Aveene vakamwamula uYesu vakati, “Usue tuli vaana va Abulahamu. “UYesu akavavuula akati, “Mwale muuve vaana va Abulahamu mwale muvombagha sino alyale ivomba uAbulahamu.<sup>40</sup> Une nivavulile uvwakyang'haani vuno nippulike kuhuma kwa Nguluve, umue mulonda isila ija kumbuda! uAbulahamu naalyavobile ndavule isio.<sup>41</sup> Umue muvomba imbomba sino unhaata ghwinu ivomba.” Avayahudi vala vakamwamula vakati, “Usue natuli vaana va mulisoli, uNhaata ghwitu ali jumo mwene, ghwe Nguluve.”<sup>42</sup> UYesu akavavuula akati, “UNguluve ale ave Nhaata ghwinu, mwale mukungana une, ulwakuva nihumile kwa mwene. Une nanisile muvutavulilua vwango, looli uNguluve ghwe juno asung'hile.<sup>43</sup> Kiki namukusitang'hania sino nijova? Namukusitanghania ulwakuva namulonda kukwupila imbulanisio sango.<sup>44</sup> Umue unhaata ghwinu ghwe Setano, mulonda kuvomba sino umwene. Kuhuma m'bukuulu uSetano m'budi, nailonda uvwakyanghaani, ulwakuva mwa mwene uvwakyang'haani namnevule. Kujova uvudesi Iwiho Iwake, ulwakuva umwene n'desi, kange ghwe nhaata ghwa vadesi vooni.<sup>45</sup> Lino ulwakuva une nikuvavuula isa kyang'haani, fye nambe namukunyitika.<sup>46</sup> Asi, ghwe veeni pakate palyumue juno nde-

poonu ikwoleka kyang'haani kuuti une nili mhosi? Nave sino nikuvavuulasa kyang'haani, kiki namukunyitika? <sup>47</sup> Umuunhu ghwa Nguluve ivingilila sino ijoba uNguluve. Umue namuvingilila sino ijoba uNguluve ulwakuva namuli vaanhу vaake.” <sup>48</sup> Avayahudi vakambuula uYesu vakati, “Asi, nase seene pano twiti uve uli Nsamalia, kange uli ni lipepo ililamafu?” <sup>49</sup> UYesu akavamula akati, “Une nanili ni lipepo ililamafu. Une nikumwoghopa uNhaata ghwango, neke umue namukunyoghopa. <sup>50</sup> Une nanilonda avaanhу vanginie; looli kwale unyakunginia, umwene ghwe mhighi ghwa kyang'haani. <sup>51</sup> Kyang'haani nikuvavuula, umuunu juno ivingilila, sino nivulanisia, uvufue navulamwagha lusiku.” <sup>52</sup> Pepano aVayahudi vakam'buula uYesu vakati, “Lino tukagwile kuuti uli ni lipepo ililamafu! UAbulahamu alyafwile, voope avavili valyafwile, iwandaani uveghwiti, “Umuunhu juno ivingilila sino nivulanisia uvufue navulamwagha lusiku? <sup>53</sup> Kwe kuti uve uli mbaha kukila unkuulu ghwitu uAbulahamu? UAbulahamu alyafwile, avavili voope valyafwile. Neke uve ghukuviiika veeve veeni?” <sup>54</sup> UYesu akavamula akati, “Ningihinie juune, ulughinio lwango luuva lusila mbombo, uNhaata ghwango juno umue mwidhi ghwe Nguluve ghwinu, ghwe mwene ikunginia une. <sup>55</sup> Umue namunkagwile uNguluve, une ninkagwile. Ningati naninkagwile uNguluve, niiva ndesi ndavule umue. Une ninkagwile uNguluve, kange sino ijoba nikunda. <sup>56</sup> Unkuulu ghwinu uAbulahamu aly-

hovwike fijio ye akagwile kuuti une nilikwsa, ye anyaghile, akava nu lukeelo fijio.”<sup>57</sup> Pepano aVayahudi vakamposia uYesu vakati, “Uve nufikisie nambe amaaka fijigho fihaano, uAbulahamu ummanyile ndaani?”<sup>58</sup> uYesu akavamula akati, “Kyang’haani nikuvavuula niiti, uAbulahamu ye akyale kuholua UNE KWENILI.”<sup>59</sup> aVayahudi ye vapuliike isio, vakahola amavue kuuti vantove vabude. Neke umwene akifisa, akahuma muluviika ulwa nyumba inyimike ija kufunyila.

## **Yohani 9**

<sup>1</sup> Ikighono kimonga uYesu ye ighenda, ali na vavulanisivua vaake, akamwagha umuunhu jumonga umbofu amaaso kuhuma iholua.  
<sup>2</sup> Avavulanisivua vala vakamposia uYesu vakati, “Ghwe m’bulanisi, umuunhu uju alyaholilue m’bofu vwimila inyivi saani? Vwimila inyivi saake nambe vwimila inyivi sa vapaafi vaake?”  
<sup>3</sup> UYesu akavamula akati, “Umuunhu uju naalyaholilue m’bofu vwimila inyivi saka, nambe vwimila inyivi sa vapaafi vaake. Ulwene alyaholilue mbofu, neke ingufu sa Nguluve sivoneke kukilila umwene.<sup>4</sup> Tulondua kuvomba imbombo ija Nguluve junu asung’hile, pano jijiighe mwisi. Ikilo jikwsa pano umuunhu nangavombe imbombo iji.<sup>5</sup> Pano nijighe mu iisi, nili lumuli ku vaanhуooni.<sup>6</sup> UYesu ye ajovile isio, akafuunya amati paasi, akakanda akatope na mati ghalu, akapaka amaaso gha m’bofu jula.  
<sup>7</sup> Akambuula akati, “Lutagha ghwoghe ku maaso mu lilamba ilya Siloamu (Ilitavua ili Siloamu kwe kuti junu asunghile). Pepano akaluta kukwogha

ku maaso, akagomoka ilola. <sup>8</sup> Avabading'hani vaake na vange vooni vano valyale vikumwagha ulutasi isuma ifinu, vakava vikuposania viiti, “Asi, umuunhu uju naghwe juno ikalagha pamonga isuma ifinu?” <sup>9</sup> Vamonga vakati, “Ghwe mwene. “Avange vakati, “Naghwe mwene looli ahwaniine fijo nu mwene. “Neke umwene akavavuula akati, “Neene!” <sup>10</sup> Pe vakamposia vakati, “Luveele ndaani kuhanga amaaso ghaako ghilola?” <sup>11</sup> Umwene akavamula akati, “Umuunhu juno itambulua Yesu, avele akandile akatope, amhakile amaaso, pe ambulile atiile, ‘Lutagha ghwoghe mu lilamba ilya Siloamu.’ Naluta, noogha, ye navonagha ilola.” <sup>12</sup> Avaanhu vala vakamposia, vakati, “Umuunhu ujuo alikughi?” Umwene akavamula akati, “Nwisi.” <sup>13</sup> Pe avaanhu vala vakantwala ku Vafalisayi umuunhu jula juno alyale m'bofu. <sup>14</sup> Ikighono kino uYesu alyakandile akarope na kukunsosia um'bofu jula, kilyale kighono kya Sabati. <sup>15</sup> Pe aVafalisayi vakamposia umuunhu jula vakati, “Asi, usokile ndaani uvubofu vwako?” Akavamula akati, “Umuunhu jumonga amhaka akatope amaaso, neke noogha, lino nilola.” <sup>16</sup> Pepano aVafalisayi vamonga vakati, “Umuunhu juno avombile uluo, naahumile kwa Nguluve, ulwakuva ivomba mukighono ikya Sabati luno nalukwitikisivua mu ndaghilo. “Neke avange vakati, “Umuunhu umhosi ndepoonu ivomba ifidegho fino fihufia ifivalilo ndavule ifi?” Mu uluo vakalekeng'hana. <sup>17</sup> Pe aVafalisayi vakamposi kange umuunhu jula vakati, “Asi, uve ghwiti ndaani vwimila

umuunhu juno akusosisie amaaso?” Umwene akavamula akati, “Une niiti umuunhu jula m'bili ghwa Nguluve.”<sup>18</sup> Avalongosi va Vayahudi vala navalyyitiike kuuti umuunhu jula alyaholilue m'bofu neke lino asokile ilola, kuhanga vakavakemela avapaafi vaake.<sup>19</sup> Vakavaposia avapaafi avakati, “Asi, umuunhu uju juno mwiti aholilue m'bofu, mwana ghwinu? Asokile ndaani uvubofu vwake?”<sup>20</sup> Avapaafi vaake vakavamula vakati, “Usue tukagwile kuuti, uju ghwe mwana ghwitu, alyaholilue m'bofu.<sup>21</sup> Neke natukagwile atengwile ndaani kulola. Kange naju muunhu juno ansosisie amaaso, natummanyile. Mumposie, muunhu n'goyo, ikuvavuula jujuo.”<sup>22</sup> Avapaafi vaake valyajovile uluo, ulwakuva valyale vikwoghopa avalongosi va Vayahudi. Avalongosi avuo valyiting'hiine kuuti umuunhu juno ikwitika kuuti uYesu ghwe Kilisite, vikun'daga mumasinagogi ghaave.<sup>23</sup> Fye nambe avapaafi vala valyatiile, “Umwene muunhu n'goyo, mumposie jujuo.”<sup>24</sup> Avalongosi va Vayahudi vakankemeela ulwa vuvili umuunhu jula juno alyale m'bofu, vakam'buula vakati, “Jova isa kyang'haani pamaaso gha Nguluve! Usue tukagwile kuuti umuunhu ujuo juno akusosisie, mhosi.”<sup>25</sup> Umwene akavamula akati, “kuuti umuunhu ujuo mhosi, une nanikagwile, looli nikagwile kuuti nilyle m'bofu, lino nilola.”<sup>26</sup> Vakamposia kange vakati, “Asi, umuunhu ujuo avobile kiki kukukusosia amaaso ghaako?”<sup>27</sup> Umwene akavamula akati, “Une nivavulile, umue namulonda

kukumhulika, kiki mulonda nivavuule kange? NeKe najumue mulonda kuuva vavulanisivua vaake?” <sup>28</sup> Pe vakam'bepanula vakanjova vakati, “Uve veeve m'bulanisivua ghwake! Usue tulivavulanisivua va Moose. <sup>29</sup> Tukagwile kuuti uNguluve alyajovile nu Moose, neke umuunhu ujuo, natunkagwile na kuno ahumile. <sup>30</sup> Umwene akavamula akati, “Isi sa kudegha! Namunkagwile kuno ahumile umuunu juno asosisie amaaso ghaango! <sup>31</sup> Tukagwile kuuti uNguluve naipulika inyifunyo isa vahosi looli ikumpulika umuunhu juno ikumwoghopa nakuvomba isa vughane vwake. <sup>32</sup> Kuhuma uNguluve ipela iisi, natughelile kupulika nambe lusiku kuuti umuunhu jumonga ansosisie umuunhu juno aholilue m'bofu. <sup>33</sup> Umuunhu ujuo aale aave naahumile kwa Nguluve, naale ivomba isi.” <sup>34</sup> Avene vakamwamula vakati, “Uve ulyaholilue mu vuhosi, ghulonda pikutuvulanisia usue? Pe vakan'daga mu sinagogi. <sup>35</sup> UYesu akapulika kuuti umuunhu jula van'dagile mu sinagogi. Pe akalondagha kutang'hana naghwo. Ye amwaghile, akamposia akati, “Uve, ghukumwitika uMwana ghwa Muunhu? <sup>36</sup> Umuunhu jula akamwamula akati, “Gwe Mutwa, ghwe veeni uMwana ghwa Muunhu, nimwitike?” <sup>37</sup> UYesu akamwamula akati, “Umwaghile, umuunhu ujuo ghwe juno ijova nuuve lino.” <sup>38</sup> Umuunhu jula akati, “Nikwitika! “Pe akamwimika uYesu. <sup>39</sup> UYesu akati, “Une nisile mu isi kuhiga avaanhу, kuuti avabofu amaaso valolaghe, vano vikuvona vilola, vave vabofu amaaso.” <sup>40</sup> Avafalisayi

vamonga vano pwevalyale pala, ye vapuliike imhola isio, vakamposia vakati, Asi, kwe kuti usue tulivabofu? <sup>41</sup> UYesu akavamula akati, “Mwale muuve vabofu, namwale muuva vahosi. Neke ulwakuva mwiti mulola, mujigha nu vuhosи vwinu.”

## **Yhani 10**

<sup>1</sup> Kyang'haani nikuvavuula, umuunhu juno ikwingila muluvagha lwa ng'holo kisila kukilila pa mulyango, neke ikilila pavunge, ujuo mhiji kange mhijim'budi. <sup>2</sup> Looli juno ikilila pa mulyango, ujuo ghwe ndiimi ghwa ng'holo. <sup>3</sup> Umuloleleli ghwa luvagha ikun'dindulila umulyango, nasi ng'holo sipulika ilisio ilya n'diimi ujuo. Ghwope ikusikemeela ing'holo saake nijingi nilitavua lyake na kukusihumia kunji. <sup>4</sup> Kyande asihumisie ing'holo saake sooni, umwene ilongola, iseene sikum'bingilila, ulwakuva silikagwile ilisio lyake. <sup>5</sup> Ing'holo nasingam'bingilile umuunhu umhesia, ulwene sikunkimbila ulwakuva nasilimanyile ilisio lyake.” <sup>6</sup> UYesu alyavavulile aveene ikihwani kisio iki, neke aveene navalyasitanghinie sino ikuvavuula. <sup>7</sup> Pe u Yesu akavavuula kange akati. Kyang'haani nikuvavuula, une nene mulyango ghwa luvagha pano sikwingilila ing'holo. <sup>8</sup> Avaanhu vooni vano valyatalile kulyune kuuva vaduimi va ng'holo, valyale vahiji kange vahijivabudi, nasing'holo nasikavapulikagha. <sup>9</sup> Une neene mulyango, umuunhu juno ikwingila kukillila une ipokua. Kukilila une ikwingilagha na

kuhuma na kuuva ni kyakulia. <sup>10</sup> Umhiji  
 ikwisa nu vufumbue vwa kuhija, kubuda na  
 kunangania. Une nisile kuuti avaanhу vave nu  
 vwumi, vave navwo ifighono fyoni. <sup>11</sup> Une nili  
 ndiimi nnofu. Undiimi unnofu, anoghile kufua  
 vwinila ing'holo saake. <sup>12</sup> Umuunhu juno idiima  
 ing'holo vwinila uluhombo, ujо na ndiimi  
 ghwa ng'holo, kange ing'holo NASAKE, angavone  
 ing'hekeeva jikwisa, ikimbila na kukusileka  
 ing'holo seene. Pe ing'hekeeva jikwalukila  
 ing'holo na kupalanisia. <sup>13</sup> Umuunhu ujо<sup>13</sup>  
 ikimbila ulwakuva uvufumbue vwake lwe  
 luhombo, ing'holo na kiinu kwa mwene. <sup>14</sup> Une  
 nili n'diimi nnofu. Ing'holo sango nisikagwile,  
 soope sing'hagwile. <sup>15</sup> n'davule uNhaata vule  
 ang'hagwile une, na juune vule ninkagwile  
 umwene. Une nitavula uvwumi vwanga vwinila  
 ing'holo. <sup>16</sup> Nili ni ng'holo isingi sino nasili  
 muluvagha ulu. Soope isio nilonda kukusileeta,  
 soope sikumhulikagha. Apuo kiiva kipugha  
 kimo, nu ndiimi jumo. <sup>17</sup> Ulu, fyenambe uNhaata  
 anganile: Nitawwile kufua, neke niiva mwumi  
 kange. <sup>18</sup> Nakwale umuunhu juno ndepoonu  
 ivusia uvwumi vwango, looli une nitawwile june  
 kufua. Une nilinuvutavulilua uvwa kuvusia  
 uvwumi vwango, kange nili nu vutavulilua uvwa  
 kuvugomosia. Nuupile ululaghilo ulu kuhuma  
 kwa Nhaata.” <sup>19</sup> Amasio aghuo ghakapelela  
 aVayahudi kulekeng'hana. <sup>20</sup> Vinga mu veene  
 vakati, “Uju ali ni lipepo, kange apelwike.  
 Lwakiki kukumpulikisia?” <sup>21</sup> Avange vakava  
 viiti, “Amasio aghuo naghihuma mwa muunhu  
 unya lipepo. Asi, ilipepo ndepoonu likumpelela

um'bofu amaaso kulola?” <sup>22</sup> Pe ghukafika unsiki ughwa kikulukulu ikya kwimika ku Yelusalemu. <sup>23</sup> Pe pano aVayahudi vamonga Unsiki ughuo ghulyale ghwa mhepo, uYesu alyale mu nyumba inyimike ija kufunyila, ighenda ghenda mu luviika luno lukatambulwagha, “Luviika lwa Solomoni.” <sup>24</sup> Pe pano aVayahudi vamonga vakankong’hanila, vakam’buula vakati, “Ghukutuviika mu nganighani mpaka liighi? Nave veeve Kilisite tuvuule pa vuvalafu!” <sup>25</sup> UYesu akavamula akati, “Une nivavulile kuuti neene veeni, neke umue namukwitika. Sino nivomba mu litavua lyo Nhaata, sihufia kuuti neene veeni. <sup>26</sup> Neke umue namukwitika ulwakuva namuli ng’holo sango. <sup>27</sup> Ing’holo sango sipulika ilisio lyango, na juune nisikagwile, soope sikumbingilila. <sup>28</sup> Nisipeliile uvwumi uvwa kuvusila kusila, nasilasova lusiku. Kange nakwale umuunhu ughwa kusivusia mumavoko ghango. <sup>29</sup> UNhaata ghwango juno amheliile ing’holo isio, m’baha kukila vooni, kange nakwale umuunhu juno ndepoonu ikusivusia mu mavoko ghaake. <sup>30</sup> Une nu Nhaata tuli vumo.” <sup>31</sup> Ye vapuliike isio, vakahola kange amavue kuuti vantove. <sup>32</sup> Neke uYesu akavavuula akati, “Nivombile imbombo nyanga inofu pamaaso ghiinu. Imbombo isio nivombile ku ngufu sa Nhaata. Lino, mu sino nivombile, lukilu luno lukuvapelela kukunhova na mavue?” <sup>33</sup> AVayahudi vakamwamula bakati, “Natulonda kukukutova na mavue vwimila imbombo inofu sino nivombile, ulwene tukukutova ulwakuva ghukumuligha

uNguluve. Ghukuviika uli Nguluve napano uli muunhu ndavule avaanhу avange!"  
 34 UYesu akavamula akati, "Nalilembilue mufitabu fiinu ifya ndaghilo kuuti, 'Umue muli manguluve'?"<sup>35</sup> Nave alyavatambwile manguluve, avaanu vano valyapulike ilisio lyake (kange aMalembe aMimike ifighono fyoni ghijova isa kyang'haani),<sup>36</sup> lino mujova kwa juno uNhaata alyantawwile akansung'ha mu iisi mwiti, 'nikumaligha u Nguluve,' pano niiti 'Une nili Mwana ghwa Nguluve'?<sup>37</sup> Nave nanivomba imbombo isa Nhaata, namunganyiti kange.  
 38 Neke nave nivomba, nambe namukunyitika, mwitikaghe vwinila imbombo isio neke mukagule na kukulutanghania kuuti uNhaata ali mulyune, najuune nili mwa Nhaata."<sup>39</sup> Neke vakava vilonda pikunkola kange, neke uYesu akavatyegha.<sup>40</sup> U Yesu akaluta kange imwambo ija ikya Yolidani, pano uYohani alyale ikwofugha avaanhу, akava ukuo ifighono fidebe.<sup>41</sup> Ye ali kula, avaanhу vinga vakaluta kwa mwene viiti, "UYohani naalyavombile nambe ikivalilo kimo, neke imhola sooni sino alyajovile vwinila umuunhu uju, sa kyang'haani.<sup>42</sup> Ukuo avaanhу vinga vakamwitika uYesu.

## **Yohani 11**

<sup>1</sup> Kwe alyale umuunhu jumonga akatambul-wagha Lasali. Umwene palikimo na valumbu, uMaliya nu Malita vakikalagha mukikaaja ikya Betania. Umuunu uju alyale ntamu. <sup>2</sup> UMaliya ujuo ghwe juno alyampakile u UMaliya ujuo, ulumbu ghwa Lasali juno alyale ntamu, ghwe

juno alyampakile amafuta uMutwa uYesu mu-maghulu, na kukumpulusia ni linyele lyake.

<sup>3</sup> Avalumbu avuo vakasuung'ha imhola kwa Yesu kuuti, Mutwa umanyani ghwako uLasali ntamu.” <sup>4</sup> UYesu ye apuliike imola iijo akati, “Inhamu iijo najikum'buda, looli jimwaghile kuuti avaanhу vavuvone uvuvaha vwa Nguluve, neke uMwana ghwa Nguluve aghinisivu kukilla inhamu iijo.” <sup>5</sup> UYesu alyamughanile uLasali palikimo na valumbu uMalita nu Maliya. <sup>6</sup> Neke ye apuliike kiuuti uLasali ntamu, umwene akajigho ifighono fivi ikalile kukuo. <sup>7</sup> Pambele akavavuula avavulanisivua vaake akati, “Tuvuuke tugomoke kukighavo ikya Yudea.” <sup>8</sup> Avavulanisivu vakambuula vakati, “Ghwe mbulanisi, imihe pahepa aVayahudi valondagha pikukutova na mavue, uve ghulonda kange pigomoka ukuo?” <sup>9</sup> UYesu akavamula akati, “Asi, imwisi najili ni fivalilo kijigo na fivili? Umuunhu angaghende pamwisi, naangakuvalе ulwakuva ulumuli lukumulikila, ikufyagha fyoni. <sup>10</sup> Neke angaghende pakilo ikuvala, ulwakuva nsila lumulinkate mwa mwene.” <sup>11</sup> UYesu ye amalile kujova isio, akavavuula avavulanisivua vaake akati, “Ummanyani ghwitu uLasali aghonelile, neke niluta kuuti ninsimule. <sup>12</sup> Pe avavulanisivua vaake vakambuula vakati, “Ghwe Mutwa, nave aghonelile, isisimuka. <sup>13</sup> UYesu alyale ijoba imhola ija kufua kwa Lasali, neke avavulanisivua vaake valyale visaagha kuuti ijoba imhola ija kughonelela itulo. <sup>14</sup> Pe uYesu akavavuula pa vuvalafu akati, “ULasali awfile.” <sup>15</sup> Neke une nihovoka vwimila umue ulwakuva nakweniveele kula uLasali ye

ifua, kuuti umue munyitikaghe. Lino tuvuuke kwa Lasali. <sup>16</sup> Pe uTomasi juno itambulua, “Mung’hungu” akavavuula avavulanisivua ava-jaake akati, “Najusue tuvuuke, tulute tufue pa likimo nu Yesu. <sup>17</sup> Unsiki uYesu ye ifika mu kikaaja ikya Betania, akavona uLasali ali ni fighono fine mu mbiipa. <sup>18</sup> Ikikaaja ikya Betania kilyale piipi ni likaaja ilya Yelusalemu ikilomita itatu ndiiki. <sup>19</sup> Avaanhu vinga mu Vayahudi vakiisa kukuvahungila uMalita nu Maliya, ulwakuva valyafwile nu lumbu. <sup>20</sup> Pepano uMalita akapu lika kuuti uYesu afiike, akaluta kukumwupilila neke uMaliya akajigha mu nyumba. <sup>21</sup> Pe uMalita akam’buula uYesu akati, “Mutwa, pe usava, ulumbulyango ngale naafwile. <sup>22</sup> Neke nambe lino nikagwile kuuti ungansuume uNguluve kimonga, ikukupeela.” <sup>23</sup> UYesu akam’buula akati, “Ulumbulio isyuka.” <sup>24</sup> UMalita akati, “Nikagwile kuuti ilisyuka ikighono ikya vusililo kino avaanhu vooni vilisyuka.” <sup>25</sup> UYesu akambuula akati, “Une nene nikuvasyusia avaanhu na kuku vapeela uvwumi. Juno ikunyitika une, nambe afue iiva mwumi; <sup>26</sup> ghwope umwumi, juno ikunyitika une, naangafue. Ghukwitika isio?” <sup>27</sup> UMalita akamwamula akati, “Eene Mutwa, nikwitika kuuti uve veeve Kilisite, Mwana ghwa Nguluve, juno veeve Twahulagha kuuti ghulikwisa mu iisi.” <sup>28</sup> UMalita ye ajovile isio, akaluta kukunkemeela unnuuna maliamu uMaliya akam’buula kuvuseyfu akati, “Um’bulanisi isile, ikukukemeela.” Pe uMaliya. <sup>29</sup> Umaliamu ye apulike isio, akavuuka ng’haaing’haani na

kuluta kwa Yesu. <sup>30</sup> Unsiki ughuo uYesu alyakyale kukwingila mu kikaaja ikio, alyale pala pala pano uMalita akalutile kukumwambilila. <sup>31</sup> Pepano aVayahudi vano valyale munyumba nu Maliamu palikimo na vaanhу vano vaka-lutile kukuvahungilila, ye vamwaghile ivuuka ng'haning'haani ihuma kunji, vakam'bingilila ulwakuva vakava visaagha kuuti iluta kulila kumbiipa. <sup>32</sup> Pepano uMaliamu akafika pa Yesu, akafughama, akambuula akati, "Mutwa, peusava ulumbu lyango ngale naafwile." <sup>33</sup> UYesu ye avwene ililia, vope vano vakaale vikum'bingilla vilila, akalemala na kupumuka mu mwojo gh-wake; <sup>34</sup> akajova akati, "Mumughonisie kughi?" Vakamwamula vakati, "Ghwe Mutwa, ghwise ulole." <sup>35</sup> UYesu akalila. <sup>36</sup> Pepano avaYahudi vakajova vakati, "Lolagha vule akamughanile uLasali!" <sup>37</sup> Neke vamonga vakati, "Asi, uju naghwe juno akansosisie um'bofu amaaso, lino kiki naavombile kimonga kwa Lasali kuuti aleke pifua?" <sup>38</sup> Pepano uYesu ye ajiighe ipumuka mu mwojo ghwake, akafika pa mbiipa. Imbi-ipa iijo, jilyabughulilue na kudindua ni livue ilikome. <sup>39</sup> UYesu akavavuula akati, "Vusia ilivue ilio. "UMalita ulumbu ghwa Lasali um-fue, akati, "Ghwe Mutwa, umbili ghuuva ghu-volile, ulwakuva fikilile ifighono fine kuhuma ifua. <sup>40</sup> UYesu akambuula akati, "Nanivele nikuvulile kuuti ungitike, ghukuvuvona uvu-vaha vwa Nguluve?" <sup>41</sup> Pe vakavusia ilivue lila. UYesu akalola kukyanya akati, "Ghwe Nhata, nikukuhongesia ulwakuva ghupulika in-yifunyo sango. <sup>42</sup> Nikagwile kuuti ghukumulika

ifighono fyoni, neke nijova isi vvimila ilipugha  
 lyvaanhu ava, neke viyike kuuti uve veeve  
 usung'hile.” <sup>43</sup> UYesu ye ajovile isio, akalila  
 fijo akati, “Lasali huma kunji kuno!” <sup>44</sup> Pe  
 umfue, akuhuma kunji, amaghulu na mavoko  
 ghaake ghaniengelilue ni sanda, kumaaso apiny-  
 ilue ni kitambala. UYesu akavavuula akati,  
 “Mumhudule, mumuleke alutaghe. <sup>45</sup> Pepano  
 aVayahudi vinga vano vakisile kukumhungila  
 uMaliamu, ye vasivwene sino avombile uYesu,  
 vakamwitika; <sup>46</sup> neke vamo mu veene vaka-  
 luta ku Vafalisayi kukuvavuula sino avombile  
 uYesu. <sup>47</sup> Pe avavaha va vatekesi na Vafal-  
 isayi vakakong'haana, vakaposania vakati, “Tu-  
 vombe kiki? Ulwakuva umuunhu uju ivomba  
 ifidegho finga. <sup>48</sup> Nave tukumuleka anala  
 mwene, avaanhу vooni kyande vikumwitika,  
 aValooma vikwisa vitoola fyoni poope palyusue  
 na ji iisi jiitу. <sup>49</sup> Pe umo muveene, juno  
 akatambulwagha Kayafa, alyale ghwe ntekеси  
 um'baha umwaka ughuo, akavavuula akati,  
 “Umue namukagwile kimonga! <sup>50</sup> Namusaagha  
 kuuti vvimila umue, lunoghiile umuunhu jumo  
 afue vvimila avaanhу vooni, neke iisi jooni  
 jileke kutipulua. <sup>51</sup> Amasio gha ntekеси ujоo  
 naghaale masaaghe ghaake. Ulweene ulwakuva  
 alyale ntekеси m'baha umwaka ughuo, alyavi-  
 ile kuuti uYesu ifua vvimila iisi; <sup>52</sup> nakwekuti  
 ifua vvimila iisi jeene, looli u Yesu palikimo  
 na kukuvakong'hania avaana va Nguluve vano  
 vapalasiine neke vaave palikimo. <sup>53</sup> Kuhuma  
 ikighono ikio, avalongosi va Vayahudi, vakaten-  
 gula kulonda isila ija kum'buda uYesu. <sup>54</sup> Mu

uluo, uYesu akaleka kughenda pa vuvalafu ku Vayahudi. Pepano akavuuka pala akaluta ku kikaaja kimonga kino kikatambuluagha. Efuhimbu. Ikikaaja ikio kilyale piipi ni lihaka, akikala ukuo palikimo na vavulanisivua vaake. <sup>55</sup> Ikyimike ikya Pasaka ija Vayahudi kilyale piipi. Avaanhу vinga kuhuma mu fikaaja vakaluta ku Yelusalemu kuuti vivalasie ye kikyale pifika ikyimike ikio. <sup>56</sup> Pe vakava vikumulonda uYesu. Ye vali mu nyumba inyimike ija kufunyila, vakiima viposania viiti, “Mwiti ndaani, umuunhu uju, neke naikwesa ku kyimike?” <sup>57</sup> Unsiki ughu, avavaha va vatekesi na Vafalisayi valyavavuulile avaanhу kuuti, umuunhu ghweni angakagule pano pwale u Yesu, alutaghe kukuvavuula neke vankole.

## **Yohani 12**

<sup>1</sup> Ifighono ntanda ye kikyale kufika ikyimike ikya Pasaka, uYesu akaluta kange ku kikaaja ikya Betania. Ukuo kwe kuno akikalagha uLasali, juno uYesu alyansyusisie kuhuma ku-vafue. <sup>2</sup> Pe vakamuling'hanikisia ikyakulia ikya pakivwilile. UMalita ghwe juno akava ikuvaten-gelela. ULasali alyale umo ghwa vano vakikalile nu Yesu vilia ikyakulia. <sup>3</sup> Pe uMaliamu akaloota isupa ija mafuta amanofu agha ndalamu nyinga, akampaka uYesu mumaghulu nakukumpulusia ni lenyele lyake. Ulunuusi lwa mafuta aghuo, lukamema inyumba jooni. <sup>4</sup> Neke uYuda Isikali-oti, umo muvavulanisivua vaYesu unya kum-wohela, akati, <sup>5</sup> “Kiki amafuta amafuta aghuo naghangaghusivue, “Kiki amafuta aghuo, na

ghale ghighusivua indalama idinali ifilundo fitatu, neke vapelue avakotofu? <sup>6</sup> UYuda ye ijova isio, nakwekuti alyale ikuvavonela ikisa avakotofu, looli ulwakuva alyale mhiji. Umwene ghwe juno alalye ikola inyambe ja ndalama, akahijagha indalama mu nyambe igio. <sup>7</sup> UYesu akati, “Mumuleke, ulwakuva amhakile kuling’hania um'bili ghwango vwinila ikighono ikya kusyilua. <sup>8</sup> Avakotofu muuva navo ifighono fyoni neke namuuva nuune ifighono fyoni.” <sup>9</sup> Avayahudi vinga vakapulika kuuti uYesu aliku Betania, pe vakaluta ukuo. Navalylalutile kukumulola ju Yesu mwene, looli valondagha vamwaghe nu Laasi juno uYesu akan-sysisie kuhuma ku vafue. <sup>10</sup> Pe avavaha va vatekesi vakapuling’hana kukum’buda ghwope uLasali, <sup>11</sup> ulwakuva vwinila kusyuka kwa mwene, aVayahudi vinga valyavalekile avalongosi vaave, vakamwitika uYesu. <sup>12</sup> Ikighono ikya vuvili. avaanhу viinga vakiisa ku kyimike ye vapulooke kuuti uYesu ali musila ikwisa ku Yelusalemu, <sup>13</sup> pe vakatoola amataifa agha mapiki gha matende, vakahuma kukumwambilila kumo viiti, “Hosana! Afunyilue juno ikwisa mu litavua lya Mutwa, Ntwa ghwa Vaisilaeli.” <sup>14</sup> UYesu akajaagha inyana ja dogovi akajangalila; ndavule, “<sup>15</sup> Lilembilue mu malembe aMimike kuuti, “Nungoghopaghe, mwalive Syoni, lolagha, Untwa ghwinu ikwisa, angalile inyaana ja dogovi.” <sup>16</sup> Ulutasii avavilanisivua va Yesu navalyasikagwile isio; neke uYesu ye aghinisivue, pe vakakumbuka

kuuti isio silyalembilue vwinila umwene na  
 kuuti isi vam'bombile umwene. <sup>17</sup> Avanu  
 vano valyaale palikimo nu Yesu ye ikunkemeela  
 uLasali kuhuma mu mbiipa na kukunsyusia,  
 vavakava vikuvoleta avange imhola ijo. <sup>18</sup> Mu  
 uluo avaanhу vingа vakaluta kukumwambilia,  
 ulwakuva valyapuliike kuuti avombile ikidegho  
 ikio. <sup>19</sup> Neke aVafalisayi vakavulana vakati,  
 "Mulola? Lino natunoghile kuvomba kimonga,  
 lolagha, avaanhу vooni vikum'bingilila umwene.  
<sup>20</sup> Mu vaanhу vano valyalutile kukumwimika  
 uNguluve. ku Yelusalemу ikighono ikya kyimike  
 ikya Pasaka, mwevalyale aVayunani vamonga.  
<sup>21</sup> Avuo vakaluta kwa Filipo umhuma mu likaaja  
 ilya Betisaida mukighavo ikya Galilaya, vakati.  
 "Tusuma tutang'hane nu Yesu." <sup>22</sup> UFilipo aka-  
 luta kukum'buula uNdeleya imhola ijo; pe vooni  
 ve vavili vakaluta kukum'buula uYesu. <sup>23</sup> UYesu  
 akavamula akati, "Unsiki ughwa kughinisivua  
 une ne mwana ne Mwana ghwa Muunhu ghu-  
 fikile. <sup>24</sup> Kyanghaani nikuavuvuuula, imbeju  
 nave najisyililue mu lihanga na kuvola. ji-  
 jigha jijio jeene. Looli jingasyilue na kuvola  
 jimela na kukoma ifipeke fiinga. <sup>25</sup> Umuunhu  
 juno ilonda kupoka uvwumi vwake, ujuo ik-  
 wambisia, juno ikwambisia uvwumi vwake mu  
 iisi iji, ikuvupoka kuhanga kufika ku vwumi  
 uvwa kuvusila kusila. <sup>26</sup> Umuunhu ghwени  
 juno ilonda pikumbombela une, ambingililaghe,  
 pano pwenili naju m'boombi ghwango pwe ivis-  
 agha. Kange umuunhu angambombele une,  
 uNhaata ikumughinia. <sup>27</sup> Lino umwojo ghwango  
 ghupumuka; nisivombe kiki? Ninsume uNhaata

amhoke mu lutalamu luno luta pikunyaagha? Neke, lelo nifikiile unsiki ughu vwimila kukwupila ulutalamu uluo. <sup>28</sup> Ghwe Nhaata, uhufie uvuvaha vwa litavua lyako.” Pe likapulikika ilisio kuhuma kukyanya likati, “Nihufisie uvuvaha vwa litavua lyango, kange nifhufiagha.” <sup>29</sup> Ilipugha lya vaanhу vano pwevalyale pala vakapulika ilisio ilio vamonga vakati, “Fula jigulwime! “Avange vakati, “Nyamola ajovile naghwo!” <sup>30</sup> Neke uYesu akavavuula akati, Ilisio ilio nalipulikiike mulwa kunhanga une, looli mulwa kuvatanga umue. <sup>31</sup> Lino ghufikile unsiki ughwa Nguluve kuhigha avaanhу mu iisi iji, na kukun'daga uSetano umbaha ghwa iisi iji. <sup>32</sup> Neke ningatosivue kukyanya kuhuma mu iisi iji, nikuvapelela vooni kukwisa kulyune. <sup>33</sup> Alyajovile uluo kuvonia kuuti ilifua vufue vuki. <sup>34</sup> Avaanhу vala vakamwamula vakati, “Usue tupulooke mu ndaghilo kuuti uKilisite iiva mwumi ifighono fyonи Lino lwa ndaani ghwiti uMwana ghwa Adamu ilondua kutosivua kukyanya? UMwana ghwa Muunhu ghwe veeni? <sup>35</sup> UYesu akavamula akati, “Ulumuli lulipalikimo numue unsiki n'debe Mughendaghe mulumili uluo vule lujiighe pwelule, nekeing'hiisi jileke kukuvalema, ulwakuva junо ighenda mung'hiisi naakagwile kuno iluta. <sup>36</sup> Lino muli nujuo ghwe lumuli, mumwitikaghe neke muuve vaana ya lumuli. “Ye amalile kujova isio, akavuuka, aki-fisa kuuti valeke kukumwagha. <sup>37</sup> Nambe uYesu alyavombile ifidegho finga pamaaso ghaave navalayamwitiike <sup>38</sup> mu uluo ghakava ghak-

wilanisivue amasio ghano alyajovile um'bili u Yesaya kuuti, “Mutwa ghwe veeni juno itiike imhola siitu? Kange ghwe veeni juno umhufisie ingufu saako?” <sup>39</sup> Sino silyavapeleliile valeke kukwitika, se sino alyajovile um'bili uYesaya kange kuuti, <sup>40</sup> “Avabofwile amaaso ghaave, kange aghavikile amoojo ghaave kuuva masiti kukwitika; kuuti valalola na maaso ghaave kange vakagule mu moojo ghaave pe vavanguke najuve nivapoke.” <sup>41</sup> UYesaya alyajovile isio ulwakuva alyavuvwene uvuvaha vwa Yesu, akajova imhola saake. <sup>42</sup> Neke lelo, vope avolongosi vinga valyamwitike uYesu, neke navalyale vikuhufia pa vuvalafu kuuti vikumwitika, ulwakuva valyale vikwoghopa kuuti, aVafalisayi kyande vikuvaldaga, mu masinagogi. <sup>43</sup> Valyale vilonda kughinisivua na vaanhу, kukila kughinisivua nu Nguluve. <sup>44</sup> U Yesu akati, “Juno ikunyitika une, naikuniyitika juune, looli ikumwitika na juno asung'hile une, <sup>45</sup> ghwope juno anyaghile une, amwaghile na juno asung'hile. <sup>46</sup> Un'e nili lumihu, nisile mu iisi kuuti umuunhu ghweni juno ikunyitika une aleke mu ng'hiisi. <sup>47</sup> Umuunhu juno ipulika amasio ghango, neke naigadilila, une nanikumhigha, ulwakuva nanilisile mu iisi kukuvalhigha avaanhу, looli kukuvalpoka. <sup>48</sup> Neke juno ikung'haana une, kange naikwupila amasio ghango, amasio ghano nijova ghe ghano ghilikumigha ikighono ikya vusililo. <sup>49</sup> Ulwakuva nanijovile muvutavulilua vwango juune ne mwene. Looli uNhaata juno asung'hile une ghwe juno andaghiile isa kujova. <sup>50</sup> Kange

nikagwile kuuti, ululaghilo lwake lukuvapeela avaanhу uvwumi uvwa kuvusila kusila. Mu uluo sooni sino nijova se sino uNhaata andaghile kuuti nijove.”

## **Yohani 13**

<sup>1</sup> Ye kikyale kufika ikyimike iky Pasaka, uYesu alyakagwile kuuti unsiki ghwake ughwa kuvuuka mu iisi, kuluta kwa Viise ghufikile, alyavaghanile avaanhу vaake ifighono fyoni, ahufisie ulughono lwake kufika kuvusililo vwa vwumi vwake mu iisi muno. <sup>2</sup> USetano akava ampeliile uYuda umwana ghwa Simoni Iskalioti amsaaghe agha kumwohela uYesu. <sup>3</sup> UYesu alyakagwile kuuti uNhaata ampeliile uvutavulilua vwoni, na kuuti alyahumile kwa mwene kange igomoka kwa mwene. <sup>4</sup> Ye vali mu kyakulia, akiima, akafuula isopeka jaake akatandika paasi, pe akatoola ikitambala, akidenga. <sup>5</sup> Akaviika amalenga mu likalai akatengula kukuvofugha amaghulu avavulanisivua vaake na kupulusia ni kitambala kino idingile. <sup>6</sup> Pe akafika pa Simoni uPeteli, pe uPeteli akati, “Ghwe Mutwa, ghalonda pikunyofugha une amaghulu?” <sup>7</sup> UYesu akamwamula akati, “Luno nivomba, uve naghukulutang’hania lino, looli kyaghkuluta ng’hania pambele.” <sup>8</sup> UPeteli akambula akati, “Uve nung’anyafughe une amaghulu nambe padebe.” UYesu akamwamula akati, “Nave nanikukwofugha, naghuuva nu vuhangilanisi nuune.” <sup>9</sup> USimoni Peteli akati, “Ghwe Mutwa, navefylulivua uleke pikunyafugha gha maghulu, looli unyafughe nagha mavoko naghu

mutu.” <sup>10</sup> UYesu akamwamula akati, “Umuunhu juno oghile um'bili, anoghiile kukwogha gha maghulu gheene, ulwakuva um'bili ghwoni ghuvaliile, najumue muvaliile, neke jumonga mulyumue mulyumue naavaliiile.” <sup>11</sup> UYesu alyankagwile juno kyande ikumwohela, fye nambe alyatiile, “Jumonga mulyumue naavaliiile. <sup>12</sup> UYesu ye amalile kukuvofugha amaghulu avavulanisivua vaake, akafwala isopeka jaake, akagomoka pano akitakile, pe akavaposia avavulanisivua vaake akati, “Asi, Mulutang'hinie luno nivombile kulyumue? <sup>13</sup> Umue mukunhambula mwiti, 'Mbulanisi, kange mwiti Ntwa, Mujova seseene, ulwakuva nili m'bulanisi, kange nili Ntwa. <sup>14</sup> Lino nave une ne juno nili m'bulanisi, kange nili Ntwa nivofwighe amaghulu, enendiiki na jumue fye muvombelanilaghe. <sup>15</sup> Nivahufisie ikihwanikisio iki, kuuti najumue muvavombelaghe avajiinu ndavule nivavombiile umue. <sup>16</sup> Kyang'haani nikuvavuula, unkami nam'baha kukila untwa ghwake, nambe unsung'hua na m'baha kukila juno ansung'hile. <sup>17</sup> Lino, ndave ughatang'hinie amasio agha, ufunyile nave ghuvomba isio. <sup>18</sup> Nanijova isi kulyumue mweni, ulwakuva vano nivasalwile nivakagwile, neke njova kukwilanisia aMalembe aMimike ghan ghititi, “Umuunhu juno tuhangile kulia, angalukiile. <sup>19</sup> Nikuvavuula isi lino pano sikyale pivoneka, neke kya sivoniike mwitike kuuti une NEENE. <sup>20</sup> “Kyang'haani nikuvavuula, juno ikumwupila umuunhu juno ninsung'hile, ikunyupila une, ghwope juno ikunyupila une ikumwupila juno

asung'hile une. <sup>21</sup> ye ajovile isio, akapumuka mu mwojo, akavavuula avavulanisivua vaake akati, “Kyang'haani nikuuvavuula, jumonga mulyumue itapikunyohela.” <sup>22</sup> Avavulanisivua vaake vakava vilolane, navakakagula kuuti ikun'jova veeni. <sup>23</sup> Umo muvavulanisivua va Yesu juno uYesu alyamughanile fijo, alikalile piipi nu Yesu. <sup>24</sup> USimoni uPeteli akamposia um'bulanisivua ujuo akati, “Tuvuule ghwe veeni juno ikunjova.” <sup>25</sup> Pe um'bulanisivua jula juno eghiime pa kifuba kya Yesu akamposi akati, “Mutwa, ghwe veeni?” <sup>26</sup> UYesu akamula akati, “Juno nikumpeela ikinkate kino nitapisaasa, ghwe mwene. “Pe akasaasa ikinkate, akampeela uYuuda umwana ghwa Simoni Isikalioti. <sup>27</sup> UYuda ye upiile ikinkate kila, uSetano akamwingila. Apuo uYesu akambuula akati, “Sino ghulonda kuvomba, vomba ng'haning'hani!” <sup>28</sup> Neke vooni vano valyale vilia pala, nakwealyale nambe jumo juno alyakagwile kuuti kiki uYesu am'bulile u Yuuda enendikio. <sup>29</sup> Neke ulwakuva uYuda ghwe juno alyale ikola indalama, vamonga vakati uvone uYesu am'bulile kuuti akaghule ifinu fino filondua pa kikulukulu, avange vakatisagha uvone ansung'hile akaghule fimonga ifya kuvapeela avakotofu. <sup>30</sup> UYuda ye upiile ikinkate kila, akahuma kunji ng'haninghaani. Unsiki ughuo jilyale kilo. <sup>31</sup> UYuda ye ahumile kunji, uYesu akati, “Lino uNguluve ahufisie uvuvaha vwango ne Mwana ghwa Muunhu, ghwope uNguluve uvuvaha vwake vuvonike kukilila une. <sup>32</sup> Nave Unguluve uvuvaha vwake vuvonike kukilila une, ghwope uNguluve kyaihufia uvuvaha vwango

kisila kudiila. <sup>33</sup> “Mwe vanango, nili numue unsiki n'debe vuvule, kyamukundonda, neke lino nikuvavuula ndavule nikavavulile aVayahudi kuuti, “Une kuno niluta umue namungafike. “Lino nikuvavuula na jumue. <sup>34</sup> Lino nikuvapeela ululaghilo ulupia kuuti, 'Mughananaghe, ndavule une vule nivaghanile umue najumue mughananaghe. <sup>35</sup> Nave mughanana, avaanhuvoni vikagula kuuti umue muli vavulanisivua vango.” <sup>36</sup> USimoni uPeteli akamposia akati, “Ghwe Mutwa, ghuluta kuughi?” UYesu akamwamula akati, “Kuno niluta nungam'bingilile lino, looli ghulikumbingilila pambele. <sup>37</sup> UPeteli akati, “Ghwe Mutwa, kiki naningakuvingilile lino? Une nitawwile vwinila uve, nambe kuuve kwe kufua.” <sup>38</sup> UYesu akamwamula akati, “Ghutawwile vwinila une, nambe kuuve kwe kufua? Kyang'haani nikukuvuula, ing'hongove ye jikyale kuvika, ghuuva ung'hanile katatu.

## **Yohani 14**

<sup>1</sup> Namungapumukaghe mu moojo ghiinu, Mukumwitika uNguluve, munyitikaghe na june. <sup>2</sup> Uvukalo kwa Nhaata gwango vweleefu, vwale vuleke kuuva vweleefu, nanaale nikuvavuula kuuti niluta kukuva ling'hanikisia uvukalo. <sup>3</sup> Ningalute kukuvaling'hanikisia uvukalo, nigomoka kukuvatoola, neke pano pwennili une na jumue pwemuvisaghe. <sup>4</sup> Kuno niluta, isila mujikagwile.” <sup>5</sup> U Tomasi akati kwa Yesu, “Ghwe Mutwa, usue natukagwile kuno ghuluta. Lino ndepoonu tukujikagula ndaani isila? <sup>6</sup> UYesu akamwamula akati, “Une

neene sila, nene vwakyang'haani, kange nene vwumi. Nakwale juno ifika kwa Nhaata kisila kukilila kulyune. <sup>7</sup> Mwale mung'hagule une, mwale mukunkagula na juNhaata. Kuhuma lino munkagwile, kange mumwaghile." <sup>8</sup> UFilipo akati, "Ghwe Mutwa, utusoone uNhaata. Ungatusoone luuva lukwiline. <sup>9</sup> UYesu akamwamula akati, "Filipo, nikalile numue ifighono fyoni ifi, nunghagwile? Umuunhu juno anyaghile une, amwaghile uNhaata. Lina ghwiti, 'Utusoone uNhaata'? <sup>10</sup> Asi, namukwitika une nili nkate mwa Nhaata, ghwope uNhaata ali nkate mulyune? Amasio ghano nikuvavuula, nanijova muvutavulilua vwango, looli uNhaata juno ali nkate mulyune juno ivomba imbombo saake isi. <sup>11</sup> Munyitike une, kuuti nili nkate mwa Nhaata, ghwope uNhaata ali nkate mulyune. Munyitike une vvimila imbombo sino nivomba. <sup>12</sup> Kyang'haani nikuvavuula, juno ikunyitika une; ivombagha imbombo sino nivomba une, kange ivombagha imbaha kukila isi, ulwakuva niluta kwa Nhaata. <sup>13</sup> Mungasuume kimonga mu litavua lyango, nivomba neke uvuvaha vwa Nhaata vuvoneke kukilila une. <sup>14</sup> Mungasuume kimonga mu litavua lyango nivomba. <sup>15</sup> Nave munganile, muvingililagha indaghilo sango. <sup>16</sup> Pe najune nikunsuma uNhaata, ghwope ikuvapeela untangili ujunge ikalaghe numue ifighono fyoni. <sup>17</sup> Untangili ujoo ghwe Mhepo juno ihufia uwakyang'haani. Neke avanu vano navikumwitika uNguluve navangamwupile, ulwakuva navikumwagha kange navankagwile. Looli umue munkagwile ul-

wakuva ikukala numue kange ali nkate mulyumue. <sup>18</sup> Naningaveleke mwe veene; Nikwisa kange kulyumue. <sup>19</sup> Ghusighiile unsiki ndebe avaanhу vano navikumwitika uNguluve, navanganyaaghe kange, Looli umue mulikunyaagha kange, ulwakuva une nili mwumi na jumue muuva vuumi. <sup>20</sup> Ikighono ikio mulikagula kuuti une nili nkate mwa Nhaata, najume muli nkate mulyune, najune nili nkate mulyumue. <sup>21</sup> Umuunhu juno ikwupila indaghilo na kukusivingilila, ujо ghwe juno anganile. Juno anganile, ghwope uNhaata ikumughana umwene, na juune nikumughana na kukuhufia kwa mwene.” <sup>22</sup> U Yuuda(uju naghwe Yuuda u Isikalioti) akamposia uYesu akati, “Ghwe Mutwa, lwa ndaani ghulikuhufia kulyusue, neke naghulikuhufia ku vaanhу avange?” <sup>23</sup> UYesu akamwamula akati, “Umuunhu juno anganile ivomba sino nikum’buula, ghwope uNhaata iku-mughana umwene sino nikum’buula, ghwope uNhaata ikumughana umwene, Une nu Nhaata tukwiisa kwa mwene, na kukukala palikimo kwa mwene. <sup>24</sup> Neke juno naanganile, naivomba sino nikumbuula. Kange sino nikumbuula nasango, looli sa Nhaata juno asung’hile. <sup>25</sup> Nivavulile sooni isio pano nijiighe palikimo numue. <sup>26</sup> Neke Untangili ujо, uMhepo uMwimike juno unhaata ikunsuung’ha mu litavua lyango, ghwe ikuvavulanisyanga na kukuvakumbusia sooni sooni sino nivavulile. <sup>27</sup> Nikuvapeela ulutengano lwango. Ulutengano uluo luno nikuvapeela, naluli ndavule luno luhuma ku vaanu ava mu iisi. Namungapumukaghe mu moojo ghiinu,

nambe kukwoghopa kimonga. <sup>28</sup> Mukamhulike ye nijova kuuti, 'Niluta, neke nigomoka kange kulyumue. 'Nave munganile kyang'haani, mwale muhovoka kuuti niluta kwa Nhaata, ulwakuva. uNhaata ghwe m'baha kukila une. <sup>29</sup> Nivavulile isi lino pano sikyaale kuvoneka, neke kyande sivonike mwitike. <sup>30</sup> Naningajove numue kange amasio minga, ulwakuva uSetano um-baha ghwa iisi iji ikwisa. Neke nsila ngufu kulyune, <sup>31</sup> Nivomba ndavule andaghiile uNhaata, neke avaanhу ava mu iisi vakagule kuuti nimughanile. Lino mwimetulutaghe.

## **Yohani 15**

<sup>1</sup> UYesu akati, "Une neene nsabibu ghwa kyang'haani, uNhaata ghwe nya mughunda. <sup>2</sup> Ilitaafi mulyune lino nalikoma isabubu, uNhaata ikulivusia. Looli lino likoma, ikulinosia vunofu kuuti likome fijo. <sup>3</sup> Umue munosivue, ulwakuva mwitiike sino nivavulile. <sup>4</sup> Mukalaghe nkate mulyune, najuune nikukalagha nkate mulyumue. Ilitaafi nalingakome isabibu nave nalili mu nsabibu, fye lulivuo, na jumue namungavombe sino ilonda uNguluve, nave namuli nkate mulyune. <sup>5</sup> Une nili nsabibu, umue muli matafi. Juno ikukala nkate mulyune, najume mwa mwene; ujuo ivombagha sino ilonda u Nguluve, ulwakuva kisila kuuva nkate mulyune, namungavombe kimonga. <sup>6</sup> Umuunhu junu naikukala nkate mulyune itaghua, ndavule ilitaafi lino nalikoma vule litaghua na kukwuma, avaanhу vihola na kunyanya. <sup>7</sup> Nave mujigha mukukala nkate mulyume na masio ghango

ghikale mulyumue, musumaghe kwa Nhaata kino mulonda, ghwope ikuvapeela. <sup>8</sup> Pano mukoma fijo ifipeke, muuva vavulanisivua vango kyang'haani. Mu uluo uNhaata gh-wango ighinisivua fijo. <sup>9</sup> Ndavule uNhata vule anganile une, enendiiki najuune nivaghanile umue. Lino mukalaghe mu lughano lwango. <sup>10</sup> Nave muvingilila sino nikualaghila, apuo mukukala mu lughano lwango, ndavule une vule nikusivingilila sino uNhaata andaghiile na kukukala mu lughano lwake. <sup>11</sup> Nivavulile isi kuuti muuve nu lukeelo ndavule une, kange muuve nu lukeelo uluvaha fijo. <sup>12</sup> Lino nikualaghila kuuti mughananghe ndavule une vule nivaghanile umue. <sup>13</sup> Nakwale umuunhu unya lughano kukila ulu, ulwa kuuti, itavule uvwumi vwake vwinila umanyaani ghwake. <sup>14</sup> Nave muvomba sino nivalaghiile, muuva vamanyaani vango. <sup>15</sup> Lino nanikutambula vakami vango, ulwakuva unkami naivomba sino ivomba untwa ghwake. Looli nikuvatambula umue kuuti muli vamanyaani vango, ulwakuva nivavulile sooni sino nipuliike kuhuma kwa Nhaata. <sup>16</sup> Umue namulyasalwile une, looli une nilyavasalwile umue na kukuvasuung'ha kuvomba sino ilonda uNguluve, kuuti, kino mukunsuma umwene mu litavua lyango avapelaghe. <sup>17</sup> Lino nikualaghila umue kuuti mughananaghe. <sup>18</sup> Nave avaanhу ava mu iisi muno, vikuvalalila umue mukagulaghe kuuti valyatalile kukung'halalila une. <sup>19</sup> Mwale muuve vaanhу va mu iisi muno, avaanhу avuo vaale vikuaghana, ulwakuva muli vaanhу vaave. Neke umue nivasalwile

kuhuma mu iisi muno, lino umue namuli va mu iisi. Mu uluo avaanhу ava mu iisi vikuvakalalila.  
<sup>20</sup> Mukumbukaghe ilisio lino nilyavavulile kuuti, Unkami nam'baha kukila untwa ghwake.' Lino, nave vakamhumwisie une, najumue viku-pumusyagha, nave vakiitike imbulanisio sango, nasi siinu vikwitikagha. <sup>21</sup> Vikuvavombelagha isio sooni vwimila vwa kukumbingilila une ulwakuva navammanyile juno asung'hile une.  
<sup>22</sup> Naale nileke kukwisa kukuvavuula, navaale viiva vahosi, neke lino navangakaane vwimila uvuhosi vwave. <sup>23</sup> Umuunhu juno ikung'halalila une, ikunkalalila na ju Nhaata. <sup>24</sup> Nivombile ifidegho ifivaha, fino nambe muunhu na aghelile kuvomba, vaale valeke kukufyagha, ngale vasila makole. Nambe vafyaghile fyoni nivom-bile, vajiighe vikung'halalila une naju Nhaata.  
<sup>25</sup> Isio sivombeka mulwa kukwilanisia aMalembe aMimike ghano ghiiti, 'Vakang'halaliile vuvule.'  
<sup>26</sup> Nikunsuung'ha kulyumue uNtangili kuhuma kwa Nhaata. Untangili ujоо ghwe Mhepo juno ihufia uvwakyang'aani, umwene ikwolek-agha imhola sango. <sup>27</sup> Najumue mukwolekagha imhola sango, ulwakuva muli palikimo nuune kuhuma ye nitengula imbombo.

## **Yohani 16**

<sup>1</sup> Nivavulile isio kuuti namungalulekaghe ulwitiko lwinu. <sup>2</sup> Avaanhу vikuvalagha mu masinagogi ghaave, kange ghukwisa unsiki pano umuunhu angavabude umue itisagha ikum'bombela uNguluve. <sup>3</sup> Vilikuvavombela isio, ulwakuva navankagwile uNhaata, kange

navang'hagwile une. <sup>4</sup> Nivavulile isi kuuti unsiki ughuo ghungafike, mukumbukaghe kuuti nilyavavulile. Nanilyavavulile isi ulutasi, ulwakuva nilyale palikimo numue. Sikuwaambia kuhusu mambo haya tangu mwanzo kwa sababu nilikuwa pamoja nanyi. <sup>5</sup> Poope nambe lino niluta kwa juno alyasung'hile une kulyumue, neke napwale nambe jumo pakate palyumue juno ikumhosia kuuti, "Ghuluta kughi?" <sup>6</sup> Neke ulwakuva nivavulile isio, musukunile fijo. <sup>7</sup> Nikavavuula isa kyang'haani kuuti, luuva lunofu kulyumue une nivuuke, ulwakuva ningaleke pivuuka uNtangili naangise. Looli ningalute nikunsuung'ha kulyumue. <sup>8</sup> Untangili ujuo angiise, ikuvahufyagha avaanhava mu iisi uvuhosi vwave, uvugholofu nu vuhighi vwa Nguluve. <sup>9</sup> Ihuflagha uvuhosi vwave, ulwakuva navikunyitika une. <sup>10</sup> Ikuvahufiagha uvugholofu vwango ulwakuva niluta kwa Nhaata, namulikunyaagha kange. <sup>11</sup> Ikuvahufyagha uvuhighi vwa Nguluve ulwakuva uNguluve amalile kukumhigha uSetano umbaha ghwa iisi iji. <sup>12</sup> Napano nijighe naso nyinga isa kuvavuula, neke nanikuvavuula, ulwakuva unsiki ughu namungasitang'hanie. <sup>13</sup> Looli uMhepo ughwa kyang'haani ujuo angiise, ikuvalongosiagha kuvengilila uvwakyang'haani; ulwakuva naijovagha muvuta vulilua vwave jujuo, looli ijovagha sino apuliike na kukuvavuula sino sikwisa. <sup>14</sup> Umwene ihuflagha uvuvaha vwango, ulwakuva ikuvavulagha sino upiile

kulyune. <sup>15</sup> Fyoni fino alinafyo uNhaata, fyango, fye nambe nivavulile kuuti, uMhepo ujuo ikuvavulagha sino upiile kuhuma kulyune. <sup>16</sup> Ghusighiile unsiki n'debe namukunyaagha kange, neke pambele unsiki n'debe kange mukunyaagha. <sup>17</sup> Vamo mu vavulanisivua vaake vakava viposania viiti, "Asi, kwe kuti kiki pano iiti, 'Ghusighile nsiki n'debe namukunyaagha, neke pambele unsiki n'debe mukunyaagha? Na pano iiti ulwakuva niluta kwa Nhaata?" <sup>18</sup> Vakava viposania viiti, "Kwekuti kiki pano iiti, 'Ghusighile unsiki n'debe?' Natusitang'hinie isi sino ijoba." <sup>19</sup> UYesu akakagula kuuti vilonda kukumposia sino ajovile, pe akati, "Muposania sino nijovile kuuti, "Ghusighile unsiki n'debe mukunyaagha, neke pambele unsiki n'debe mukunyaagha'? <sup>20</sup> Kyang'haani nikuvavuula, umue mulilila na kusukunala neke avaanhу ava mu iisi vilihovoka. Mulisukunala, neke pambele ulisukunalo lwinu luluhambuka lukeelo. <sup>21</sup> Umukijuva pano ipaapa, iiva nu lusukunalo ulwakuva ali nu vuvafi. Neke angapaape, maikumbuka kange uvu vafi uvuo, ulwakuva iiva nu lukeelo ulwa kuuva nu mwana. <sup>22</sup> Najumue muli nu lusukunalo lino, neke nilikwisa kange kulyumue neke muliiva nu lukeelo. Nakwale juno anoghiile kuvusia ulukeelo uluo kulyumue. <sup>23</sup> Kange unsiki ughuo ghungafike, namulikumhosia kimonga. Kyanghaani nikuvavuula, mungansuumme kimonga uNhaata mu litavua lyango, ikuvapeela. <sup>24</sup> Nambe lino namunsumile kimonga mu litavua lyango. Musumaghe mupelua, neke

ulukeelo lwinu lukwilane. <sup>25</sup> Nijovile isio numue mufihwanikisio, neke ghukwisa unsiki ghuno naniovagha numue kange mu fihwanikisio. Looli nijovagha numue pa vuvalafu imhola sa Nhaata. <sup>26</sup> Unsiki ughuo musumagha mu litavua lyango, naniiti une nikuvasumilagha kwa Nhaata, jeeje! <sup>27</sup> Unaata jujuo avaghanile umue ulwakuva manganile une, kange mukwitika kuuti nihumile kwa Nguluve. <sup>28</sup> Nilyahumile kwa Nhaata, nikiisa mu iisi muno; kange nivuuka mu iisi muno, nigomoka kwa Nhaata. <sup>29</sup> Avavulanisiva vaake vakati, “Ulolile, lino ghujova pavuvalafu, naghujova mu fihwanikisio. <sup>30</sup> Lino, tukagwile kuuti uve usikagwile sooni, naghulonda umuunhu ghweni akuposiaghe lumonga. Mu uluo tukwitika kuuti ulyahumile kwa Nguluve. <sup>31</sup> UYesu akavaposia akati, “Lino mukwitika? <sup>32</sup> Lolagha, unsiki ghuli piipi, lweli kange sesene ghufikile, pano umue mupalasana nujunge iluta kwa mwene na kukundeka ne mwene. Neke une nanili ne mwene ulwakuva uNhaata ali palikimo nuune. <sup>33</sup> Nikuvavuula isi kuuti muve nu lutengaano, ulwakuva muli nkate mulyune. Pa iisi apa muli ni mhumhuko, neke namungoghopaghe ulwakuva une nijilefisie iisi.”

## **Yohani 17**

<sup>1</sup> UYesu ye amalile kujova isio, akalola kukyanya akati, “Nhaata, akavalilo kafikile; umughinie umwanaako, neke - <sup>2</sup> ghwope umwanako akughinie uve ndavule vule umpeliile uvutavulilua uvwa kuvalongosia avaanhу vooni, neke avapeele uvwumi uvwa

kuvusila kusila. <sup>3</sup> Uvwumi uvwa kuvusila kusila vwe uvu: vakukagule uve ghwe Nguluvuve ghwa kyang'haani, ghwe juno uli jumo ghwe mwene, kange vang'hagule une ne Yesu Kilisite ne juno ulyasung'hile ku veene. <sup>4</sup> Une nikughinisie pa iisi apa mulwa kumala imbombo jila jino ulyamheliile. <sup>5</sup> Lino ghwe Nhaata, unginie une palikimo nuuve, mu uvuaha vuno nilyale navwo palikimo nuuve iisi ye jikyale kupelua. <sup>6</sup> Avanu vano ulyamheliile mu iisi, nivahufisie uvuvaha vwa litavua lyako. Avaanhу avuo valyale vaako ukamheela une, voope valigadilile ilisio lyako. <sup>7</sup> Lino vakagwile kuuti fyonи fino ulyamheliile fihumile kulyuve, <sup>8</sup> ulwakuva imhola jino ulyamheliile nivapulisie, voope vupiile, vakagwile kuuti kyang'haani nihumile kulyuve, kange vikwitika kuuti uve veeve ulyasung'hile une. <sup>9</sup> Une nikuvasumila avaanu vaako avuo, ulwakuva ve vano ulyamheliile. Nanikuvasumila avaanhу vooni mu iisi. <sup>10</sup> Avaanhу vango vooni, vaako; avaanhу vaako, vango uvuvaha vwango vuvoniike kukilila aveene. <sup>11</sup> Une lino vivuuka mu iisi, nikwisa kulyuve, neke aveene vajiighe mu iisi, Ghwe Nhaata ghwe Mwimike, uvalolelelaghe mu ngufu isa litavua lyako lino ulyamheliile. Uvalolelelaghe kuuti vaave nu vumo ndavule tuli vumo une nuve. <sup>12</sup> Ye nili palikimo na veene, navalolelelagha mu ngufu isa litavua lyako lino ulyamheliile. Nivadimile, nakwale nambe jumo juno asovile, looli juno akanoghiile kusova kukwilanisia sino silyalembilue mu Malembe aMimike. <sup>13</sup> Lino nikwisa kulyuve,

nijova amasio agha pano nijiighe mu iisi, kuuti avavulanisivua vango vavisaghe nu lukeelo mu moojo ghaave, ndavule nilinalwo une. <sup>14</sup> Nivavulile ilisio lyako, neke avaanu mu iisi vavakalalile, ulwakuva avavulanisivua vango nava mu iisi ndavule une vule nanili ghwa mu iisi. <sup>15</sup> “Une nanikukusuma kuuti uvavusie mu iisi. muno, looli nisuma uvapoke kwa mhosi uSetano. <sup>16</sup> Aveene nava mu iisi, ndavule une vule nanili ghwa mu iisi. <sup>17</sup> Ilisio lyako vwe vwa kyang'haani, lino nikukusuma uvavalasie avaanhу vaako nu vwakyang'haani uvuo, vaave vaako. <sup>18</sup> Ndavule ulyasung'hile une mu iisi, najune fye nivasung'hile mu iisi. <sup>19</sup> Nikutavula lwoni kulyuve vwinila aveene, neke voope vitavule lwoni kulyuve kukukala mu vwakyanghaani. <sup>20</sup> Nanikuvasumila va vulanisivua veene, looli nikuvasumila na vano vikunyitika, vwinila kupulisivua na veene, <sup>21</sup> Kuuti vooni avuo vavisaghe nu vumo, vavisaghe nkate mulyusue, ndavule uve uli nkate mulyune na juune nili nkate mulyuve, Nisuma vavisaghe vumo neke avaanhу vitike kuuti uve veve usung'hile une. <sup>22</sup> Uvuvaha vuno ulyamheliile, najuune nivapeliile aveene, neke vavisaghe nu vumo ndavule une vule nili nu vumo nuuve. <sup>23</sup> Une niive nkate mu veene, najuuve nkate mulyune neke vaave nu vumo uvukwilanifu. Luuve enendiiki neke avaanhу avange vakagule kuuti uve veeve ulyasung'hile une, na kuuti uvaghanile ndavule unganile une. <sup>24</sup> Ghwe Nhaata, nilonda kuuti,

avaanhу umheliile vavisaghe palikimo nuune, pooni pano niiva, neke vavuvone uvuvaha vwango vuno ulyamheliile, ulwakuva ulyangani kuhuma iisi ye jikyale kupelua. <sup>25</sup> Ghwe Nhaata ghwe ghwa kyang'haani, avaanu ava mu iisi navakukagwile, neke une nikukagwile. Kange avavulanisivua vango vakagwile kuuti uve veve ulyasung'hile. <sup>26</sup> Nivavulanisie vakukagule uve, kange nifivombagha uluo kuuti vaghananaghe ndavule unganile une, na juune niive kuwa ndani yao.”

## **Yohani 18**

<sup>1</sup> UYesu ye amalile pikufuunya, akavuuka palikimo na vavulanisivua vaake, vakakila uluvonde ulwa Keduloni, vakingila mumughundo ughwa miseituni. <sup>2</sup> UYuuda unya kumwohela uYesu, alyaghumanyile umughunda ughuo, ulwakuva kekinga uYesu na vavulanisivua vaake vakakong'hanagha apuo. <sup>3</sup> Pe akakilongosia ikipugha kya vasikali na valoleleli kuhuma ku vavaha va vatekesi na ku Vafalisayi, akaluta navo mu mughunda kumo vakolile itaala, imuli ni filwilo. <sup>4</sup> UYesu alyakagwile sooni sino kyasikumwagha, akaluta kuveene, akavaposia akati, “Mukumulonda veeni?” <sup>5</sup> Pe aveene vakamwamula vakati, “Tukumulonda uYesu uMunasaleti.” UYesu akavavuula akati, “Neene” UYuda umwohesi alyimimile palikimo na vaanhу avuo. <sup>6</sup> UYesu ye avavulile kuuti, “Neene” vakagomoka kinsana nsana vakaghua. <sup>7</sup> Kange akavaposia akati, “Mukumulonda veeni?” Vakamwamula vakati, “Tuku-

mulonda uYesu uMunasaleti.” <sup>8</sup> UYesu akavamula akati, “Nivavulile kuuti neene. Lino nave mukundonda une, muvaleke avaanhу ava valutaghe.” <sup>9</sup> UYesu akajovile enendiiki kukwilanisia sino alyajovile kuuti, “Vano ulyamhe-liile nanisofisie nambe jumo. <sup>10</sup> USimoni uPeteli alyale ni bamba, akasomola, akadumula imbulughutu ija kundio ija m'bombi ughwa ntekesi um'bahа. Um'bombi ujuo akatambulu-agha Maluko. <sup>11</sup> Neke uYesu akam'buula uPeteli akati, “Gomosia ibamba jaako mu nyambe. Une ninoghiile kukwupila ulupumuko luno uNhaata anding'hanikisie?” <sup>12</sup> Avasikali vala nu mbaha ghwave na valoleleli va valongosi va Vayahudi vakankola uYesu, vakankunga. <sup>13</sup> Vakantwala taasi kwa Hanasi, unkwive ghwa Kayafa. UKayafa ujuo alyale ghwe ntekesi umbaha unsiki ughuo. <sup>14</sup> Kange ghwe juno alyavavuulile aVayahudi kuuti, lunoghile umuunhu jumo afue v威mila avaanhу vooni. <sup>15</sup> USimoni uPeteli nu m'bulanisivua ujunge vakava vikum'bingilila uYesu mumbele. Umbulanisivua ujunge ujuo, alyakaguliike nu ntekesi um'bahа, akingila palikimo nu Yesu muluviika ulwa ntekesi umbaha. <sup>16</sup> Nene uPeteli akiima akiima paanji pa mulyango, Umbulanisivua ujunge jula juno alyakaguliike nu ntekesi umbaha, akahuma panji akajova nu mhinja juno alyale ikuvadindulila avaanhу umulyango, pe akamwitikisia uPeteli kukwingila muluviika. <sup>17</sup> Umhinja jula akamposia uPeteli akati, “Asi, uve nuli umo ghwa vavulanisivua va muunhu uju?” UPeteli akamwamula akati, “Ndali, une nanili

m'bulanisivua ghwake.” <sup>18</sup> Avavombi na valoleleli valyapembile umwoto ulwakuva jilyale mhepo, vakava vikwota. Ghwope uPeteli akava palikimo na veene ikwota umwoto. <sup>19</sup> Untekesi um'baха akamposia uYesu vwimila avavulansivua vaake ni mbulanisio saake. <sup>20</sup> UYesu akamwamula akati, “Une najovaghe na vaanhу pavuvalafu, ifighono fyoni navulanisyagha mu masinagogi na Nyumba inyimike ija kufunyila, muno vikong'hana aVayahudi vooni. Nanajovagha nambe lisio limonga ku vusyefu. <sup>21</sup> Lino kiki ghukumhosia une? Uvaposie vano vapulikagha, aveene vakagwile sino najovagha. <sup>22</sup> UYesu ye ajovile isio, umo mu valoleleli juno alyale piipi nu mwene, akantova ni lipi akati, “kiki ukumwamula enendiiki untekesi um'baха?” <sup>23</sup> UYesu akamwamula akati, “Nave nijovile fivi, jova uvuviivi vwango. Neke nave nijovile vunofu, kiki ghukunova?” <sup>24</sup> UYesu ye ajiighe akungilue, uAnasi akalaghila kuuti atwalue kwa ntekеси um'baха uKayafa. <sup>25</sup> Lino uPeteli ye ikwota umwoto, vamo mu vano valyale vikwota umwoto vakamposia vakati, “Asi uve nuli umo mu vavulanisivua va muunhu uju?” Umwene akakaana akati, 'Ndali, une nanili m'bulanisivua ghwake.” <sup>26</sup> Neke umo mu vuvombi va ntekеси um'baха, juno alyale nyalukolo ghwa muunhu jula juno uPeteli akan'dumwile imbulughutu akamposia akati, “Asi, naveeve nivele nikwaghile uli palikimo nu Yesu mu mughunda?” <sup>27</sup> UPeteli akakaana kange, nakalingi ing'hongove jikavika. <sup>28</sup> Palwakilo, vakantoola uYesu kuhuma kwa Kayafa, vakantwala munyumba ija kitwa ija

ntwa ghwa Valooma. Neke aveene navakingili munyumba ijio, ulwakuva vangingile viiva valamafu. Mu uluo navaale vilia ikyakulia ikyimike iky Pasaka.<sup>29</sup> Pe untwa uPilato akahuma kunji, akavaposia akati, “Asi, umuunhu uju avombile vuhosи vuki vuno mukumhigha?”<sup>30</sup> Aveene vakamwamula vakati, “Umuunhu uju, aale ave namhosи, natwale tukumuleeta kulyuve.”<sup>31</sup> UPilato akavavyula akati, “Lino muntoole jumue, mukamhighe ndavule silungika indaghilo siinu.” Avayahudi vakamwamula vakati, ‘Usue natuli nu vutavulilua uvwa kumhigha umuunhu kuuti abudue.<sup>32</sup> Isio silyavombike enendiiki kukwilanisia sino alyajovile uYesu vule ilifua.<sup>33</sup> UPilato akagomoka munkate mu nyumba ija kitwa, akankemeela uYesu akamposia akati, “Asi, uve veee ntwa ghwa Vayahudi?”<sup>34</sup> UYesu akamwamula akati, “Sino ghukumhosia, si huma mu masaaghe ghaako juuve, pamo avaanhу avange vakwomwile kuuti umhosie?”<sup>35</sup> UPilato akamwamula akati, “Nili Muyahudi une? Avaanu kuhuma mukisina kyako, na vavaha va vatekesi ve vano vakuletile kulyune. Uvombie kiki?<sup>36</sup> UYesu akamwamula akati, “Uvutwa vwango navwa mu iisi muno, vwale vuve vwa mu iisi muno avavombi vango vaale vikunhangа kuuti nileke kukolua na Vayahudi. Neke lino uvutwa vwango navwa mu iisi muno.”<sup>37</sup> Pe uPilato akamposia akati, “Kwe kuti uve uli ntwa?” UYesu akamwamula akati, “Ujovile seseene kuuti une nili ntwa. Une nilyaholilue mu iisi, kuuti nivavulanisie avaanhу uvwakyang’haani. Umuunhu

juno ivingilila uvwakyang'haani, ikumhulikisia.”  
 38 UPilato akamosia akati, “Uvwakyang'haani kyekiki?” UPilato ye ajobile isio, akahuma kange kunji, akavavuula aVayahudi akati, “Une naniku-vuvona uvuhosi kwa muunu uju. 39 Neke umue muli nu lunqo lukumhelela une kukun'dindulilia unkungua jumo ikighono ikya kyimike kya Pasaka. Asi, mulonda nin'dindulile untwa ghwa Vayahudi?” 40 Neke avaanhу vooni vakoova vakati, “Ndali ujоo ndali, utudindulile uBalaba.” uBalaba ujоo, alyale mhijimbudi.

## **Yohani 19**

1 Pe pano uPilato akantoola uYesu na kukunkopa ni mijeledi. 2 Avasikali vala vakatenda ingeela ija mifua, vakamfwasia ku mutu, kange vakamfwasia isopeka indangali. 3 Pe vakava viveela kwa mwene na kukunnenela viiti, “Uve, ghwe ntwa ghwa Vayahudi! Vakava vikuntova na mapi. 4 akahuma kange kunji, akavavuula akati, “Pulikisia, umuunhu nikumuleta kulyumue kunji kuno mukagule kuuti une nanikuvwagha uvuhosi vumonga kwa mwene.” 5 Pe uYesu akahuma kunji afwalile ingeela ija mifua ni sopeka indangali. UPilato akajova akati, ‘Lolagha, umunu ujоo ghwe uju.’ 6 Avavaha va vatekesi na valoleleli ye vamwaghile, vakoova vakati, “Unkomelele pa kikovekano!” UPilato akavavuula akati, “Muntoole jumue mukankomelele, ulwakuva une nivona nsila nkome.” 7 Avayahudi vakamwamula vakati, “Usue tuli nu lulaghilo, vwimila ululaghilo

uluo uju anoghile kufua ulwakuva umwene ivikile Mwana ghwa Nguluve. <sup>8</sup> UPilato ye apulike amasio aguo, akoghopa kyongo, <sup>9</sup> pe akingila kange munyumba jaake ija kitwa, akamposia uYesu akati, "Uve ghuhuma kuughi?" Neke uYesu naalyamwamwile kimonga. <sup>10</sup> Pe uPilato akati, "Kiki naghukunyamula? Asi, nukagwile kuuti une nili nu vutavulilua uvwa kukudindulila, nu vwa kukukomelela pa kikovekano? <sup>11</sup> UYesu akamwamula akati, "Uve naghwale ghuuva nu vutavulilua kulyune, nave nupelilue kuhuma kukyanya. Lino umuunhu juno ambikile mu mavoko ghaako mhosi kukila uve." <sup>12</sup> Kuhuma unsiki ughuo, uPilato akava ilonda isila ija kun'dindulila uYesu. Neke aVayahudi vakoova vakati, "Ungan'dindulile umuunhu uju, naghuuva mmanyaa ni ghwa ntwa um'baha uKaisali. Umuunhu juno ikuviika kuuva ntwa, ikaana uvutwa vwa ntwa umbaha uKaisali." <sup>13</sup> UPilato ye apulike amasio aghuo, akahuma nu Yesu kunji, akikala pa kitengo kya vuhighi, munjovele ija Kiebulania pitambulua Gabata kwe kuti, Lwalo lwa mavue. <sup>14</sup> Ikighono ikio kilyale kighono kya kuling'hania ikyimike iky Pasaka, kaale kavalilo ka ntanda ndiiki. UPilato akavavuula aVayahudi akati, "Lolagha, uju ghwe ntwa ghwinu!" <sup>15</sup> Aveene vakoova vakati "M'busie, m'busie, unkomelele pa kikovekano." UPilato akavaposia akati, "Asi, ninkomelele pa kikovekano untwa ghwinu?" Avavaha va vatekesi vakati, "Usue natuli nu ntwa ujunge, looli ju Kaisali!" <sup>16</sup> Pe pano uPilato akam'biika uYesu mumavoko ghaake

kuuti vankomelele <sup>17</sup> Pe vakantoola uYesu, akahuma mulikaaja apindile ikikovekano kyake kuhanga kufika pano pakatambulwagha mu Kiebulania Golgota, kwekuti ling'hala lya mutu. <sup>18</sup> Apuo vakankomelela uYesu palikimo na vange vavili, jumo ulubale ulwa kundio ujunge ulwa kung'highi umwene akava pakate. <sup>19</sup> Pepano uPilato akalemba amasio na kuviika pakyanya pa kikovekano kya Yesu. Amasio aghuo ghalyalembilue, 'YESU UMUNASALETI, UNTWA GHWA VAYAHUDI. <sup>20</sup> Amasio aghuo ghalyalembilue mu njovele ija Kiebulania, ija Kilooma nija Kiyunaani. Avaanhу vingа vakava vikwimba amalemba aghuo, ulwakuva pano alyakomelilue palyale piipi ni likaaja. <sup>21</sup> Avavaha va vatekesi ava Vayahudi vakam'buula iPilato vakati, "Nungalembaghe, 'Ntwa ghwa Vayahudi; ulembe kuuti,' Umuunhu uju alyatiile, UNE NENE NTWA GHWA VAYAHUDI." <sup>22</sup> UPilato akavamula akati, "Sino nilembile, nilembile." <sup>23</sup> Avasikali ye vankomeliile uYesu vakantoola amenda ghaake, vakaghava fighavo fine, pe nujunge akatoola ikighavo kyake. Kange vakantoola isopeka jaake. Isopeka ijio najilyahonilue, ulwene jilyatavulue kuhuma ku mutu kuhanga kufika ku maghulu. <sup>24</sup> Avasikali avuo vakavulana vakati, "Isopeka iji tuleke pidemula, ulwene tusodolele kuuti jiive jaani. "Isio silyavombiike kukwilanisia aMalembe aMimike ghano ghiiti, "Valyaghavinie amenda ghango na kuviika ulusodolelo isopeka jaango." <sup>25</sup> Enendiiki fye valyavombie avasikali. Un'ghina ghwa Yesu,

unnuuna ghwa ng'ina ghwa Yesu, UMaliamu um huma mu kikaja ikya Magidala, vakimile piipi ni kikovekano kya Yesu. <sup>26</sup> UYesu akamwagha ung'ina nu m'bulanisivua juno alyamughanile, vimile piipi nu mwene, akam'buula ung'ina akati, "Mama, lolagha ujuo mwanaako." <sup>27</sup> Kange akam'buula um'bulanisivua jula akati, "Lolagha, ujuo mama ghwako." Unsiki ughuo um'bulanisivua jula akantoola umama jula, kuluta naghwo kukaaja kwa mwene. <sup>28</sup> UYesu ye awwene sooni sivombike akati, "Numilue." Alyajovile enendiiki kukwilanisia aMalembe aMimike. <sup>29</sup> Apoonu pala pwekilyale ikikong'olo kino kimemile uluhuuje ulukali ulwa sabibu. Vakatoola ikyenda vakasuvika mu luhuuje, vakakinjenga mu lupiki ulwa mpiki umuhisopo, vakantwalila pa mulomo. <sup>30</sup> UYesu ye anywile uluhuuje lula akati, "Sooni sivombiike!" Akinamisia umutu, akakunguka. <sup>31</sup> Ikighono ikio kyale kighono kya kuling'hania iSabati. Avayahudi navakalondagha amavili gha vafue ghajighe pa kikovekano pa kighono ikya Sabati, ulwakuva ikighono ikio kilyale kivaha! Pe vakansuma uPilato avitikisie kuuti amaghulu agha vanhu avuo, ghadenyue, neke vavavusie pa kiko vekano. <sup>32</sup> Pe avasikali vakaluta, vakadeenya amaghulu agha muunhu ghwa kwanda nu ghwa vuvili vano valyakomelilue palikimo nu Yesu. <sup>33</sup> Neke ye vafikile pa Yesu, vakavona afwile. Mu uluo navakadeenya amaghulu ghaake. <sup>34</sup> Umuunhu umo mu vasikali akamhomma ni mhalala uYesu pa luvafu,

jikahuma idanda na malenga. <sup>35</sup> Imhola isi silembilue nu muunhu juno alyasivwene ye sivombeka. Sino ijoba sa kyang'haani, kange ghwope akagwile kuuti sino ijoba sa kyang'haani, ikwoleka neke na jumue mwitike. <sup>36</sup> Isio silyavombiiki kukwilanisia aMalembe aMimike ghano ghiiti, "Nambe umfupa ghwake ghumo naghudenyua. <sup>37</sup> Kange aMalembe aMimike aghange ghiiti" Vikumulolagha juno vamhomile." <sup>38</sup> Isio ye sivombiike, akiisa uYesufu um huma mu likaaja ilya Alimatia. Umuunhu uju alyale m'bingilili ghwa Yesu kisyefu, ulwakuva akoghopa avalongosi va Vayahudi. Akansuma uPilato kuuti avusie um'bili ghwa Yesu pakikovekano. UPilato akamwitikisia, pe akaluta akaghuvusia. <sup>39</sup> Naju Nikodemu, juno ikighono kimonga alyalutile kwa Yesu pakilo, akiisa na mafuta amanya lunusi ulunono. Amafuta aghuo ghalyale ikiilo fijigho fitatu ndiiki. <sup>40</sup> Vooni ve vaviili vakatoola umbili ghwa Yesu vakaghuniengelela nu mwenda umpala palikimo na mafuta ghala amanya lunusi ulunono ndavule lulyale Iwiho lwa Vayahudi ulwa kusyila avaanthu. <sup>41</sup> Pano valyankomelile uYesu pweaghulyale umughunda. Mu mughunda ghula mwejilyale imbiipa imia jino navaghelile kuviika nambe muunhu. <sup>42</sup> Lino, ulwakuva ku Vayahudi ikighono kyale kighono ikya kuling'hania iSabati, vakaviika um'bili ghwa Yesu mu mbiipa jila, ulwakuva jilyale piipi.

## Yohani 20

<sup>1</sup> Ye kuhenga ikighono ikya kwasia mu

mulungu, uMaliamu Magadalena akaluta ku mbiipa. Ye afikile akavona ilivue lino valyadindiile pa mulyango ghwa mbiipa livusivue. <sup>2</sup> Pe akavuuka luvilo kuluta kwa Simoni uPeteli na kwa m'bulanisivua ujunge juno uYesu alyamughanile, akavavuula akati, “Vam'busisie uMutwa mu mbiipa, natukagwile kuno vam'bikile.” <sup>3</sup> UPeteli palikimo nu m'bulanisivua ujunge jula, vakavuuka viluta ku m'biipa. <sup>4</sup> Vooni ve vaviili vakavuuka luvilo, ne um'bulanisivua ujunge jula, akakimbila fijo kukila uPeteli, akatala kufika ku mbiipa. <sup>5</sup> Akinama, akahungiila mumbiipa, akaghavona gha menda, neke naalingile munkate. <sup>6</sup> Pe pano uSimoni uPeteli ghwope aakfika pala, akingila mu mbiipa akaghavona amenda <sup>7</sup> ni kitambala kino vakampinyile uYesu ku mutu, ikitambala ikio nakilyale palikimo na menda aghange, looli ikyene kilyale palubale. <sup>8</sup> Pe umbulanisivua ujunge jula ghwope akingila mu mbiipa, akalolana kukwitika. <sup>9</sup> Ulwakuva ye lukyale kuvombeka ulu, navalyaghatang'hinie aMalembe aMimike ghano ghiiti uYesu isyuka kuhuma kuafue. <sup>10</sup> Pe avavulanisivua vala, vakagomoka kuno vakikalagha. <sup>11</sup> Unsi ughuo uMaliamu alyimile piipi ni mbiipa ilila. Ye ajiighe ifilila akiinama akahungiliila mu mbiipa. <sup>12</sup> Akavaagha avanyamhola vavili vafwaliile amenda amapala, vikalile pano ghulyale um'bili ghwa Yesu. Jumo alikalile ulubale lwa ku mutu, ujunge ulwa ku maghulu. <sup>13</sup> Avanyamhola vala vakamposia vakati, “Gwe mama, ghulilila kiki?” Akavamula akati, “Nilila

ulwakuva vam'busisie uMutwa ghwango, kange nanikagwile kuno vam'bikile.” <sup>14</sup> Ye ajovile amasio aghuo, akasyetuka kunsana, akamwagha uYesu imile, neke naalyakagwile kuuti ghwe Yesu. <sup>15</sup> UYesu akamposia akati, Mama, ghulilila kiki? Ghukumulonda veeni? Umwene akasaghagha kuuti umuunhu ujuo ghwe m'bombi mumughunda ughuo. Akam'buula akati, “Ntwa nave um'busisie uMutwa, umbuule kuno um'bikile, nintoole.” <sup>16</sup> UYesu akati, “Maliamu! Umalimu akasyetuka, akajova mu njovele ija kiebulania akati, “Raboni” kwe kuti M’bulanisi.” <sup>17</sup> UYesu akati, “Nungang’holaghe “ulwakuva nikyale kuluta kukyanya kwa Nhaata, looli lutagha ku vavulanisivu vaango, uvavuule kuuti, niluta kukyanya kwa Nhaata ghwango juno ghwe Nhaata ghwinu, kange ghwe Nguluve ghwango na jumue Nguluve ghwinu. <sup>18</sup> UMaliamu Magadalena akaluta kuvavulanisivua va Yesu, akavavuula akati, “Une nimwaghile uMutwa!” Pe akavavuula sooni sino uYesu amulaghiile. <sup>19</sup> ikighono ikya kwasia mu mulungu, avavulanisivua va Yesu valyakong’hanile munyumba vidindiile, ulwakuva valyale vikwoghopa avalongosi va Vayahudi. UYesu akiisa, akiima pakate pa veene akati, “Ulutengaano luvisaghe numue!” <sup>20</sup> Ye ajovile uluo, akavahufia amavoko ni mbafu saake. Avavulanisivua vaake ye vakagwile kuuti ghwe Mutwa uYesu, vakahovoka fijo. <sup>21</sup> UYesu akavavuula kange akati, “Ulutengaano luvisaghe numue. Ndavule uNguluve vule alyasung’hile une, na juune

nikuvasuung'ha umue.” <sup>22</sup> Ye ajovile amasio aghuo, akavapulila umwuja ghwake, <sup>23</sup> akati, “Upila umhepo uMwimike. Avaanhu vooni vano mukuvasaghila inyivi saave, uNguluve ikuvasaghila. Vano namukuvasaghila inyivi saave, uNguluve naikuvasaghila.” <sup>24</sup> Neke uTomasi juno akambulwagha “Didimasi, “umo ghwa vavulanisivua kijigho na vavili, napwealyale uYesu ye ikuhufia kuvavulanisivua avajaake. <sup>25</sup> Avavulanisivua avajaake vala, vakam'buula uTomasi vakati, 'Usue tumwaghile uMutwa. Neke umwene akavamula akati, “Une naningitike isio, nave nanifyaghile na kukwabasia ni kyongo ifivamba ifya masumale mumavoko ghaake, na kukwabasia nu luvoko lwango ikivamba mu mbafu saake.” <sup>26</sup> Ifighono lekelalubale ye fikilile, avavulanisivua va Yesu valyakong'hanile kange mu nyumba, na ju Tomasi, mwealyale. Amalyango ghalyaa ale madinde, uYesu akiisa kange, akiima pakate pa veene, akati, “Ulutengano luvisaghe numue.” <sup>27</sup> Pe akam'buula uTomasi akati, “Tomasi, ghwise ghwabasie amavoko ghango ni kyove kyako, kange ghwabasie imbafu sango nu luvoko lwako. Ulekaghe kuuva ni nganighani, looli ghwitikaghe.” <sup>28</sup> UTomasi akamula akati, “Uve uli Mutwa ghwango! uli Nguluve ghwango.” <sup>29</sup> UYesu akam'buula akati, “Ghwitiike ulwakuva unyaghile! Vafunyilue vano vikwitika, kisila kunyaagha.” <sup>30</sup> UYesu alyavombile ifidegho ifingi finga pamaaso gha vavulanisivua vaake fino nafilembilue mu kitabu iki, <sup>31</sup> ifidegho ifi fino filembilue, filembilue neke mwitike kuuti,

uYesu ghwe Kilisite, Mwana ghwa Nguluve, neke vwimila kukumwitika umwene, mwupile uvwumi mu litavua lyake.

## **Yohani 21**

<sup>1</sup> Pambele, u Yesu akihufia kange ku vavulanisivua vaake ku lisumbe ilya Tibelia; kukuhufia kulyale enendiiki: <sup>2</sup> uSimoni uPeteli, uTomasi juno akatambulwagha Didimasi, uNatanaeli umhuma mu kikaaja ikya kana mukighavo ikya Galilaya, avana Sebedayi na vavulanisivua vaake avange vavili, vooni avuo valyale palikimo. <sup>3</sup> USimoni uPeteli akavavuula ava-jaake akati, “Niluta kulova isamaki. “Voope vakamwamula vakati, “Najusue tuluta palikimo nuuve.” Pe vakavuka viluta, vakingila mu ngalava, neke ikilo jooni navakambilila ki-monga. <sup>4</sup> Ye kuhenga, uYesu alyimile mulubale mulisumbe, neke avavulanisivua vaake navalyyakagwile kuuti Yesu. <sup>5</sup> UYesu akavaposia akati, “Vanango namulovile nambe samaki jimo?” Aveene vakamwamula vakati, “Natulovile nambe jimo!” <sup>6</sup> Akavavuula akati, “Isia uvwa fu ulubale ulwa ku ndio ulwa ngalava, ukuo mupata. “Pe uvwafu, neke vakakunua kukwesa ulwakuva vakalovile isamaki nyinga. <sup>7</sup> Pepano umbulanisivua jula, juno uYesu alyamughanile fijo akam'buula uPeteli akati, “Uju ghwe Mutwa!” USimioni uPeteli ye apulike kuuti ghwe Mutwa akatoola umwenda ghwake akipinya (ulwakuva naakipinyile vunofu) pe akitosia mulisumbe. <sup>8</sup> Avavulanisivua avange vala vakiisa ku ngalava (ulwakuva pano valyale

napakale patali palyale imita kilundo kimo ndiiki) kufika kunji kulisumbe kuhuma pa ngalava) vakava vikwesa uvwafu vumemile isamaki. <sup>9</sup> Ye vafikile kunji ku lisumbe, vakaghwagha umwoto ugwa nkala, pa mwoto apuo pwe ghulyale unkate ni samaki. <sup>10</sup> UYesu akavavuula akati, “Mulete isamaki sino sino mulovile.” <sup>11</sup> Pe uPeteli akingila mungalava, akakwesela kunji ku lisumbe uvwafu vula vuno vulyamemile isamaki imbaha. Isamaki isio silyale kilundo kimo ni fijigho fihaano ni tano. Napano isamaki silyale nyinga enendiiki, uvwafu navulyademwike. <sup>12</sup> UYesu akavavuula akati, “Mwise mulavuke, “Neke napwealyale nambe jumo mu vavulanisivua, juno alyaghelile kuposia kuuti, “Uve veeve veeni?” Valyak-agwile kuuti ghwe Mutwa. <sup>13</sup> UYesu akiisa, akatola unkate, akavapeela, kange akatoola isamaki akavapeela. <sup>14</sup> Uluo lulyale lwa vutatu uYesu kukuhufia ku vavulanisivua vaake, kuhuma isyuka ku vafue. <sup>15</sup> Ye vamalile kulia, uYesu akamposia uSimoni Peteli akati, “Simoni mwana ghwa Yohani, unganile une kukilla avange ava? “UPeteli akamwamula akati, “Eena Mutwa, uve ukagwile kuuti nikughanile.” UYesu akambuula akati, “Udimaghe ing'holo sango? <sup>16</sup> Akamposia ulwa vuvili akati, “Simoni mwana ghwa Yohani, unganile?” UPeteli akmwamula akati, “Eena Mutwa, uve ukagwile kuuti nikughanile.” UYesu akam'buula akati, “Ulolelelaghe vunono ing'holo sango.” <sup>17</sup> Akamposia ulwa vutatu, akati, “Simoni mwana ghwa Yohani, unganile?” UPeteli akasukunala

ulwakuva amposisie ulwa vutatu kuuti, “Unganile? Akamwamula akati, “Ghwe Mutwa, uve ukagwile sooni, ukagwile kuuti nikughanile.” UYesu akambuula akati, “Udimaghe ing’holo sango. <sup>18</sup> Kyang’haani nikukuvuula, ye ulinsoleka ulyamanyiine kufwala juuve amenda na kuluta kuno ghughanile. Neke ghuliiva mughogholo ghuligholosyagha amavoko ghaako, umuunhu ujunge ikukufwasyagha na kukukutwala kunu naghughanile.” <sup>19</sup> UYesu alyajovile isio kuvonia vule uPeteli ilifua mulwa kumughinia uNguluve. Ye ajovile isio akambuula uPeteli akati, “Umbingililaghe.” <sup>20</sup> UPeteli akasyetuka, akamwagha um’bulanisivua juno uYesu alyamughanile, ikuvavingilila mumbele. Um’bulanisivua ujuo ghwe juno alyeghiime pa kifuva kya Yesu ye vali pilia ikyakulia ikyapavwilile, ghwe juno alyamposisie uYesu kuuti, “Mutwa ghwe veeni juno kya ikukwohela?” <sup>21</sup> UPeteli ye amwaghile um’bulanisivua jula, akamposia uYesu akati, “Gwe Mutwa, kilihumila kiki kwa m’bulanisivua uju?” <sup>22</sup> UYesu akamwamula akati, “Nave nilonda uju ave mwumi kuhanga niliiva nigomoka, uve kikukuvava kiki? Uve mbingililaghe. <sup>23</sup> Amasio aghuo ghano uYesu alyajovile ghakapulikika ku vavingilili vinga, pe vakasaghagha kuuti um’bulanisivua ujuo nailifua. Neke uYesu naalyajovile kuuti umbulanisivua ujuo nailifua, ulwene alyatiile, “Nave nilonda uju ave mwumi kuhanga niliiva nigomoka kikukuvava kiki? <sup>24</sup> Umbulanisivua ujuo ghwe juno ikwoleka isi sooni, kange ghwe juno alembile isi. Usue tukagwile kuuti uvwolesi

vwake vwa kyang'haani. <sup>25</sup> Kwesili isingi nyinga  
sino alyavombile uYesu. Saale silembue sooni,  
nisaagha kuuti iisi jooni najaale jikwila kuviika  
ifitabu ifio.

**Vwanji Bible**  
**The New Testament in the Vwanji language of**  
**Tanzania**

copyright © 2020 Door43 World Mission Community

Language: Kiwanji (Vwanji)

Translation by: Door43 World Mission Community

Contributor: Cloud Roman, ITTO, Mwj. Lucas Ndugu, Tiralaleli Ndugu, Julieth Ngogo, Vwanjimt

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-11-10

---

PDF generated using Haiola and XeLaTeX on 11 Nov 2022 from source files dated 11 Nov 2020

0fe8b31a-d7bb-5580-ae6c-d8de2d786d46